

四庫全書

史部

# 欽定四庫全書

史部

御批歷代通鑑輯覽卷十三  
十四

詳校官侍講<sub>臣</sub>王燕緒

編修<sub>臣</sub>袁詒履勸

總校官進士<sub>臣</sub>程嘉謨

校對官編修<sub>臣</sub>吳舒帷

謄錄監生<sub>臣</sub>李邦燮

欽定四庫全書

御批歷代通鑑輯覽卷十三

漢高祖皇帝  
元年  
四年更始二年共二百二十

太祖高皇帝

姓劉氏名邦陶唐民裔劉累之後  
春秋時在晉為范氏士會入秦還其

處者為劉氏後伯  
秦涉魏休牛車以布衣起沛八載而成帝業因初

王漢遂建為有天下之號  
張晏曰禮謚法無高以帝功最高為漢太祖故特起

名焉

己亥 五年二月漢王即皇帝位

諸侯及將相共請尊漢王為皇帝漢王辭不敢當帝位羣臣皆曰大王起細微誅不義立有功德施四海諸侯王不足以道之居帝位甚實宜願大王以幸天

下使天下慶幸也漢王三讓乃于二月甲午即皇帝位汜水

濟瀆分流在山東曹州府曹縣北與定陶縣分界今定陶西北有漢祖壇高祖即位處之陽尊

王后曰皇后太子曰皇太子追尊先媼皇帝母孟康曰媼母別名



音鳥  
老反  
曰昭靈夫人

立故衡山王芮為長沙王故粵

同興越

王無諸為閩粵

福今

建周七閩地後為越人所居故曰閩越  
王

詔曰故衡山王吳芮從百粵之兵以佐諸侯誅暴秦  
有大功諸侯立以為王項羽侵奪之地謂之番君其

以長沙豫章象郡桂林南海

注俱見前

立芮為長沙王

都臨

湘今湖南長沙府治是

又曰故粵王無諸

勾踐之後姓騶氏

世奉粵祀秦

奪其地使其社稷不得血食諸侯伐秦無諸身帥閩

中兵以佐滅秦項羽廢而弗立今以為閩粵王王閩

中地

都治今福建福州府治是

弗使失職

帝西都洛陽夏五月兵皆罷還家

詔曰民前或相聚保山澤不書名數

戶籍也

今天下已

定令各歸其縣復故爵田宅其以文法教訓辨告勿

笞辱軍吏卒爵及七大夫

即公大夫以爵第七故為之七大夫

以上皆

令食邑

秦制列侯乃得食邑今所以寵之也

非七大夫以下皆復其身

及戶勿事

不輸戶賦也

置酒南宮

在今河南府洛陽縣東故洛陽城中輿地志秦時已有南北宮

上曰徹侯諸將毋敢隱朕皆言其情吾所以有天下

者何項氏所以失天下者何高起

高齊高氏之別起名也臣瓚曰高帝

時有武都侯臣起

王陵對曰陛下使人攻城畧地因以與之

與天下同其利項羽不然有功者害之賢者疑之戰

勝而不與人功得地而不與人利此其所以失天下

也上曰公知其一未知其二夫運籌帷幄之中決勝

千里之外吾不如子房填國家撫百姓給餉餽不絕

糧道吾不如蕭何連百萬之衆戰必勝攻必取吾不  
如韓信三者皆人傑吾能用之此吾所以取天下者  
也項羽有一范增而不能用此所以為吾禽也羣臣  
說服

召故齊王橫未至自殺

彭越既受漢封田橫與其徒屬五百餘人入海居島

中

在山東萊州府即墨縣東北今名田橫島

帝恐其為亂赦橫罪召之橫

謝曰臣烹陛下之使酈生今聞其弟商為漢將臣恐

懼不敢奉詔使還報帝乃詔衛尉

秦官漢因之掌  
宮門衛屯兵鄧

商曰齊王田橫即至敢動搖者致族夷乃復使使具

告以詔商狀曰田橫來大者王小者乃侯耳不來且

發兵加誅橫乃與其客二人乘傳詣洛陽至尸鄉

在河

南偃師縣西  
即周尸氏

廐置

置馬以  
傳驛者

謂其客曰橫始與漢王俱

南面稱孤今漢王為天子而橫乃為亡虜北面事之

其恥固已甚矣且吾烹人之兄與其弟併肩而事主

縱彼畏天子之詔不敢動我獨不愧于心乎遂自剄

令客奉其頭從使者馳奏之帝為流涕以王禮葬之

拜其二客為都尉橫既葬二客穿其冢傍孔皆自剄下從之帝聞之大驚以橫客皆賸餘五百人尚在海中使使召之至則聞橫死亦皆有殺

以季布

季魯季氏之別

為郎中斬丁公

丁齊丁公假支孫以次為氏此丁公晉灼曰薛

人名以徇

初楚人季布為項羽將數窘辱帝羽滅帝購求布千

金敢有舍匿罪三族布匿濮陽周氏周氏令布髡鉗

為奴賣之魯朱家

魯人以俠聞

朱家心知其季布也買置

田舍身之洛陽見滕公說曰季布何罪臣各為其主  
用職耳項氏臣豈可盡誅耶今上始得天下而以私  
怨求一人何示不廣也且以季布之賢漢求之急此  
不北走胡南走越耳夫忌壯士以資敵國此伍子胥  
所以鞭荊平之墓也

事見前

滕公言於上乃赦布召拜

郎中朱家遂不復見之布母弟丁公

師古曰同母異父之弟

亦

為項羽將逐窘帝彭城西短兵接帝急顧曰兩賢豈  
相危哉丁公乃還至是來謁帝以徇軍中曰丁公為

臣不忠使項王失天下遂斬之曰使後為人臣無微  
丁公也

帝西都關中以婁敬

婁氏邾婁國之後

為郎中賜姓劉氏

易坎之象曰王  
公設險以守其  
國象即繼之曰  
君子以常德行  
可知有德然後  
險可恃無德則  
險適足以連其  
敗洛陽關中斤  
斤比較之遠矣

齊人婁敬成隴西過洛陽求見上曰陛下都洛陽豈  
欲與周室比隆哉上曰然敬曰陛下取天下與周異  
周自后稷積德累善十有餘世至於文武而諸侯自  
歸之遂滅殷為天子成王即位周公相焉乃營洛邑  
以為此天下之中也諸侯四方納貢職道里均矣有



德則易以王無德則易以亡故周之盛時諸侯四夷  
莫不賓服及其衰也天下莫朝周不能制非惟德薄  
形勢弱也今陛下起豐沛卷蜀漢定三秦與項羽戰  
滎陽成皋之間大戰七十小戰四十使天下之民肝  
腦塗地哭聲未絕傷者未起而欲比隆于成康之時  
臣竊以為不侔也夫秦地被山帶河四塞以為固卒  
然有急百萬之衆可立興也夫與人鬪而不撻音其  
亢音則與拊其背未能全勝今陛下入關而案秦之故

此亦搯天下之亢而拊其背也帝問羣臣羣臣皆山  
東人爭言周王數百年秦二世即亡洛陽東有成皋

西有殽

殽山注見前

澠

澠池注亦見前

倍河鄉洛其固亦足恃也

上問張良良曰洛陽雖有此固其中小不過數百里

田地薄四面受敵非用武之國也關中左殽函右隴

蜀沃野千里南有巴蜀之饒北有胡苑之利

師古曰安定北

地上郡之北與胡相接之地可以畜牧故曰胡苑

阻三面而守獨以一面東

制諸侯諸侯安定河渭漕輓天下西給京師諸侯有

變順流而下足以委輸

春過反

此所謂金城千里天府

之國設說是也上即日西都關中拜敬郎中賜姓劉

氏號奉春君

良從上入關即道引不食穀杜門不出曰家世相韓及韓滅不愛萬金之資為

韓親仇雖秦天下震動今以三寸舌為帝者師封萬戶侯此布衣之極子良足矣願棄人間事欲從赤松

子遊耳

赤松子師古曰

仙人號也神農時為雨師

秋七月燕王臧荼反帝自將擊虜之九月立盧綰為燕

王

綰家與上同里開綰生又與上同日上寵幸綰故特

王之時西楚故將利幾反

楚公子食采於利後以為氏利幾以陳令降帝侯之

潁川至雒陽舉通侯  
籍召之利幾恐遂反

上亦自擊破之

後九月治長樂宮

在陝西長安縣西北故城中本秦興樂宮漢修飾之因更名

庚子六年冬十二月帝會諸侯于陳執楚王信以歸至洛

陽赦為淮陰侯

信初之國行縣邑陳兵出入有上書告信反者工問

左右左右爭欲擊之用陳平計乃偽游雲夢

平曰古者天子

有巡狩會諸侯陛下第出偽游雲夢會諸侯于陳陳楚之西界信聞天子以好出游其勢必無事而郊迎

謁因而禽之此特一力士耳帝以為然

發使告諸侯會陳信聞之疑懼

時楚故將鍾離昧亡歸信詔捕之或說信曰斬鍾離

昧以謁上上必喜亡患信從之

信見昧計事昧曰公捕我有媚漢吾今死

公隨手亡矣乃罵信曰公非長者卒自剄

持昧首謁帝于陳帝豫具武士

縛信載後車信曰果若人言狡兔死走狗烹高鳥盡

良弓藏敵國破謀臣亡天下已定我固當烹上曰人

告公反遂械繫信以歸因赦天下田肯賀曰陛下得

韓信又治秦中秦形勝之國也帶河阻山縣隔千里

持戟百萬秦得百二焉地勢便利其以下兵于諸侯

譬猶居高屋之上建瓴水也夫齊東有瑯邪即墨

注俱

見前之饒南有泰山之固西有濁河之限

晉灼曰齊西有平原河水

號黃河故曰濁河

北有渤海之利地方二千里持戟百萬縣

隔千里之外齊得十二焉此東西秦也非親子弟莫

可使王齊者上曰善還至洛陽赦信為淮陰侯

信知上畏

惡其能多稱病不朝從居常與韓羞與絳灌等列常過樊將軍噲噲晚拜送迎言稱臣曰大王乃肯臨臣信出門笑曰生乃與噲等為伍上嘗從容與信言諸將能各有差上問曰如我能將幾何信曰陛下不過

能將十萬上曰子君何如曰臣多多益善上笑曰多多益善何為為我禽信曰陛下不能將兵而善將將此乃信之為陛下禽也且陛下所謂天授非人力也

始剖符封功臣為徹侯詔定元功位次賜丞相何劍履上殿入朝不趨

始封功臣鄼

今湖北襄陽府光化縣北有鄼縣故城蕭何所封

侯蕭何食邑

獨多功臣皆曰臣等身被堅執銳多者百餘戰少者數十合今蕭何未嘗有汗馬之勞徒持文墨議論顧反居臣等上何也帝曰諸君知獵乎追殺獸兔者狗

也發縱指示者人也今諸君徒能得走獸耳功狗也  
至如蕭何發縱指示功人也羣臣皆莫敢言張良亦  
無戰鬪功帝使自擇三萬戶良曰臣始起下邳與上  
會留注見前此天以臣授陛下陛下用臣計幸而時中

臣願封留足矣不敢當三萬戶乃封良為留侯封陳

平為戶牖

陽武縣鄉漢改東昏縣後廢故城在開封府蘭陽縣東北

侯平辭曰此

非臣之功也上曰吾用先生謀戰勝克敵非功而何  
平曰非魏無知臣安得進上曰子可謂不背本矣乃



賞無知列侯畢已受封詔定元功十八人位次

師古曰謂

蕭何曹參張敖周勃樊噲酈商奚涓夏侯嬰灌嬰傅寬靳歙王陵陳武王吸薛歐周昌丁寬蟲達從第一

至十  
八也  
皆曰曹參功最多宜第一鄂千秋

鄂出姬姓晉鄂侯之後

進曰參雖有野戰略地之功此特一時之事耳上與

楚相距五載失軍亡衆跳身遁者數矣蕭何常從關

中遣軍補其處又軍無見糧何轉漕關中給食不乏

陛下雖數亡山東何常全關中以待陛下此萬世之

功也今奈何以一旦之功而加萬世之功哉何第一

高祖發縱指示  
之論早有旨蕭何  
之意千秋不過  
申明其說耳被  
以上賞過矣

參次之上曰善且曰吾聞進賢受上賞封千秋為安

平

漢縣今屬直隸深州

侯是日悉封何父子兄弟十餘人皆有

食邑益封何二千戶

春正月立從兄賈為荊王弟交為楚王兄喜為代王子

肥為齊王

帝懲秦孤立而亡欲大封同姓以填撫天下分楚地

為二國立從兄將軍賈

數有大功

為荊王

王淮東故吳地凡五十三縣

弟文信君交

帝同父少弟好書多材藝

為楚王

王淮西故楚地凡三十六縣

兄

宜信侯喜

帝仲兄字仲

為代王

王代地凡五十三縣

長子肥

帝微時外婦曹

氏為齊王

王齊地凡七十三縣諸民能齊言者皆以與齊帝兄弟四人長兄伯早卒帝微時嘗

與賓客過其邱嫂食嫂陽為羹盡轅釜客以故去已而視釜中有羹由是怨嫂故伯子不得封太上皇以為言帝曰某非忘封之也為其母不長者耳乃封其子信為羹頡侯

以曹參為齊相

參至齊聞膠西

漢縣今為膠州屬山東萊州府

有蓋公善治黃老言

樂毅之後樂臣公善修黃帝老子之言以教蓋公蓋公教于高密膠西

使人請之蓋公

為言治道貴清靜而民自定參乃避正堂以舍之用

其言齊國安集稱賢相焉

更以太原郡

漢太原郡治晉陽今太原府太原縣是

為韓國徙韓王信王

之

上以信材武所王皆天下精兵處乃以太原郡三十

一縣

胡三省注班志漢太原郡領二十一縣今以三十一縣為韓國蓋定襄未置郡故太原之地北

被邊兼有雁門之馬邑也為韓國徙信王之以備胡都晉陽信以

國被邊晉陽去塞遠請治馬邑

山西朔平府朔州西北有故城故馬邑城

也今馬邑縣唐開元中置非漢縣

許之

封雍齒為什方

漢縣今屬四川成都府

侯

上已大封功臣三十餘人其餘爭功未得行封上居洛陽南宮從複道上望見諸將往往坐沙中偶語以問張良良曰陛下與此屬共取天下今所封皆故人親愛所誅皆平生仇怨此屬畏陛下不能徧封恐又以過失及誅故相聚謀反耳上曰為之奈何良曰取上素所不快計羣臣所共知最甚者一人先封以示羣臣三月上置酒封雍齒

帝初起時齒以豐降魏事見前

因趣丞相

秦始皇稱帝即  
追尊莊襄為太  
上皇漢高祖陽  
即位距秦初不  
過二十年羣臣  
豈無藉故事者  
何爾時但追尊  
先朝而太公直  
置不問耶侯家  
令云云父子幾

急定功行封罷酒羣臣皆喜曰雍齒且侯吾屬無患  
矣

夏五月尊太公為太上皇

上還櫟陽五日一朝太公太公家令說太公曰皇帝

雖子人主也太公雖父人臣也奈何令人主拜人臣

使威重不行後上朝太公擁篲

掃竹也

迎門却行上大

驚下扶太公太公曰帝人主奈何以我亂天下法上

乃詔尊太公為太上皇賜家令金五百斤

太上皇思  
欲東歸帝

於倒置何止齊  
東之語而乃賜  
金厚賞始有尊  
稱蓋見不學無  
術矣

知之乃于驪邑改築城市街里以象豐徙豐  
民實之太上皇乃悅後因名驪邑曰新豐

秋九月匈奴寇邊圍馬邑韓王信叛與連兵

初匈奴畏秦北徙及秦滅復稍南渡河單于頭曼有

太子曰冒頓

音墨特

後有所愛閼氏

音烟支匈奴皇后號

生少子

頭曼欲立之乃使冒頓質于月支

與匈奴同俗隨畜  
移徙居和連敦煌

間控弦  
十餘萬

月氏欲殺冒頓冒頓盜其善馬亡歸

頭曼以  
為壯使

將萬騎冒頓乃作鳴鏑勒其騎習射令曰鳴鏑所射  
有不悉射者斬于是先射其善馬既又射其愛妻左  
右或不敢射者皆斬之後頭曼出獵冒頓  
以鳴鏑射頭曼左右皆隨鳴鏑而射之  
遂殺頭曼

而自立先自東胡

烏丸之祖其別為鮮卑在匈奴東故名

彊月氏盛冒

頓既立乃襲滅東胡

東胡王輕冒頓使人求得頭曼時千里馬冒頓與之己又欲得

單于一闕氏冒頓復與之東胡愈益驕兩國中間有棄地千餘里各居其邊為旣脫東胡欲有之羣臣或

曰此棄地予之亦可勿與亦可冒頓大怒曰地者國之本奈何與人言與者皆斬之即上馬令國中後出

者斬遂襲擊東胡滅之

西走月氏

月氏為匈奴所破乃遠去擊大夏而臣之為大月氏其不

能去者保南山為小月氏

南并樓煩

漢書地理志雁門郡樓煩應劭曰故樓煩胡地漢樓煩

故城今山西寧武府是

白羊

匈奴別種其王居河南即新秦中

遂侵燕代悉

復秦所奪故地至是圍韓王信于馬邑信使使求和



解漢疑信有二心使人讓之信恐誅遂以馬邑降匈奴冒頓因引兵南攻太原至晉陽

命博士叔孫通

叔孫魯叔孫氏之別  
通薛人號稷嗣君

起朝儀

帝悉去秦儀法為簡易羣臣爭功醉或妄呼拔劍擊柱帝益厭之叔孫通說上曰夫儒者難與進取可與守成臣願徵魯諸生共起朝儀帝曰得無難乎通曰五帝異樂三王不同禮禮者因時世人情為之節文者也臣願頗采古禮與秦儀雜就之上曰可試為之

令易知度吾所能行為之于是通使徵魯諸生

生有兩

肯行曰今天下初定死者未葬傷者未起又欲起禮樂禮樂所由起百年積德而後可興也吾不忍為公

所為通曰若真所徵三十餘人及上左右為學者近

鄙儒不知時變之有學術者與其弟子百餘人為綿叢韋昭曰引繩為野

外習之月餘言于上曰可試觀矣上使行禮曰吾能

為此乃令羣臣習肄明年長樂宮成諸侯羣臣皆朝

賀先平明謁者

官名掌賓讚受事

治禮以次引入殿門陳東

西鄉

功臣列侯諸將軍軍吏以次陳西方東鄉文官丞相以下陳東方西鄉

衛官張旗

志

與幟同

郎中俠

與扶同

陞大行

即典客後更名大鴻臚

設九賓臚

句傳

蘇林曰上傳語告下為臚下告上為句劉攽曰賓為傳擯之擯九賓擯者九人掌臚句傳也

于是皇帝傳警

傳警而唱警

輦出房引諸侯王以下至吏

六百石以次奉賀莫不震恐肅敬禮畢置法酒

猶言禮酌

諸侍坐者皆俯抑首以次起上壽觴九行謁者奏罷

酒御史執法舉不如儀者輒引去竟朝置酒無敢諠

譁失禮者于是上曰吾乃今日知皇帝之貴也拜通

為奉常

秦官漢因之掌宗廟禮儀後改太常

賜金五百斤以其弟子皆

為郎

初通在秦時以文學徵會陳勝起二世問諸生或言反或言盜二世作色通曰此特鼠竊狗偷

何足置齒牙二世喜拜通博士諸生青通諛通曰公不知我幾不免虎口遂亡去事楚後降漢從弟子百餘人無所進弟子慍通曰漢王方爭天下諸生寧能闕乎且待我我不忘矣及徵諸生習禮成通言于帝請官諸弟子儒生帝皆以為郎通又出所賜金悉與諸生諸生乃喜曰叔孫生真知當世務

丑 辛

七年帝自將討韓王信信及匈奴皆敗走帝追擊之

被圍平城

漢縣故城在今山西大同府大同縣東

七日乃解

上自將擊韓王信破其軍信亡走匈奴白土

漢上郡有白土

縣故城在今鄂爾多斯右翼中旗南

人曼邱臣

曼邱姓臣名

王黃等立趙苗

裔趙利為王收信散兵謀攻漢匈奴使左右賢王

匈奴

將號最為大國

將萬騎與王黃等南至晉陽漢擊之輒敗走

已復屯聚會天大寒雨雪士卒墮指者十二三上聞

冒頓居代谷

胡三省注谷在句注之北句注山名在山西代州西北

使人覘之

冒頓匿其壯士肥牛馬但見老弱羸畜使者十輩來

皆言匈奴可擊上復使劉敬往使未還悉兵三十二

萬北逐之踰句注敬還報曰兩國相擊此宜夸矜見

所長今臣往徒見羸瘠老弱此必欲見短伏竒兵以

爭利愚以為匈奴不可擊也時兵已業行上怒罵敬  
曰齊虜以口舌得官今乃妄言沮吾軍械繫敬廣武

漢縣故城在今代州西

遂先至平城兵未盡到冒頓縱精兵四

十萬騎圍帝于白登

山名在大同縣東一名白登臺

七日漢兵中外

不得相救餉帝用陳平秘計使使間厚遺閼氏

謂閼氏謂冒

頓曰兩生不相困今得漢地單于非能居之也且漢

王亦有神靈單于察之考漢書注應劭曰陳平使

畫工圖美女間遣人遺閼氏云漢有美女如此今皇

帝困厄欲獻之閼氏畏其奪已寵因與單于言之顏

師古以應說出桓譚新論蓋

冒頓乃解圍去

冒頓與王黃趙

利期黃利不至冒頓疑之亦以關氏之言乃解圍之一角會天霧漢使人往來匈奴不覺陳平請令彊弩傳兩矢外鄉從解角直出漢亦罷兵歸上至廣武斬前使十輩赦

劉敬曰吾不用公言以困平城封為建信侯

關內侯無國邑

更封陳平為曲逆侯

帝南過曲逆曰壯哉縣吾行天下獨見洛陽與是耳遂以封平

曲逆漢縣故城在今

直隸保定府完縣東南

平從帝征伐凡六出奇計

請

金行反間一以惡草具進楚使二夜出女子二千人解榮陽圍三躡足請封齊王信四請偽遊雲夢縛信五解白登之圍六

輒益封邑焉

匈奴寇代代王喜棄國自歸立子如意為代王

匈奴攻代代王不能堅守棄國間行走洛陽自歸帝

不忍致法廢為合陽

即郃陽今縣屬陝西同州府

侯以少子如意

為代王如意定陶戚姬子也

二月徙都長安

漢長安故城在今西安府長安縣西北寰宇記長安蓋古鄉聚名隔渭水對秦

咸陽宮漢于其地築未央宮置縣以長安為名

蕭何治未央宮

在今長安縣西北故長安城中三輔黃圖未央宮周迴三十八里

立

東闕北闕前殿

西京雜記未央宮因龍首山制前殿建北闕師古曰未央殿雖南鄉而上

書奏事謁見皆詣北闕公車司馬亦在焉是則以北闕為正門而又有東闕西南兩門則無蓋作宮之初



厭勝之術  
或然乎

武庫太倉上見其壯麗怒甚謂何曰天下

洵洵勞苦數歲成敗未可知是何治宮室過度也何  
曰天下方未定故可因以就宮室且天子以四海為  
家非壯麗無以重威且無今後有以加也上說遂自

櫟陽徙都之

是月置宗正  
官以序九族

壬寅八年春三月帝如洛陽九月還宮

令爵非公乘

爵八級曰公乘言  
得乘公家之車也

以上母得冠劉氏冠

帝為亭長時以竹皮為冠及  
貴常冠之所謂劉氏冠也

賈人毋得衣錦繡綺縠

締紆屬

黠能之類

操兵乘騎馬

駕車單騎俱母得用馬

癸卯

九年冬十月淮南王布梁王越趙王敖楚王交朝于

未央宮

上置酒未央前殿起奉玉卮為太上皇壽曰始大人常以臣亡賴不能治產業不如仲力今臣之業所就孰與仲多殿上羣臣皆稱萬歲大笑為樂

遣劉敬使匈奴結和親徙齊楚大族于關中

匈奴歲苦北邊上患之劉敬曰天下初定士卒罷于

兵未可以武服也冒頓殺父妻母以力為威未可以仁義說也獨可以計久遠子孫為臣耳陛下誠以適

長公主

周制天下嫁女于諸侯不自主婚使諸侯同姓者主之故曰公主

妻之彼必

慕以為關氏生子必為太子歲時問遺諭以禮節冒

頓在固為子壻死則外孫為單于可無戰以漸臣也

帝曰善欲遣長公主呂后不可乃取家人子

宮人名號

為長公主以妻單于使劉敬往結和親約敬還言于

上曰關中北近匈奴

匈奴河南地去長安近者七百里

東有彊族

齊諸

田楚昭  
屈景

一日有變陛下未得高枕而卧也願徙六國

後及豪傑名家居關中無事可以備胡有變率以東

伐此彊本弱末之術也上曰善于是徙昭屈景懷田

五族及豪傑于關中與利田宅

給與便  
利之處

凡十餘萬口

春正月趙王敖廢徙代王如意為趙王

初上解平城還至趙趙王敖執子壻禮甚卑上箕踞

慢罵之趙相貫高

貫氏原伯貫  
後以名為氏

趙午等皆怒曰吾王

孱

冀州人謂  
懦弱為孱

王也乃說敖曰皇帝遇王無禮請為王

殺之教蠶其指出血曰君何言之悞先人亡國賴帝

得復德流子孫秋毫皆帝力也願君無復出口貫高

等相謂曰吾王長者不背德何汚王為事成歸王事

敗獨身坐耳

事在七年

已而上擊韓王信餘寇過柏人

漢縣

故城在今直隸順德府唐山縣西

貫高等壁人于廁中欲以要上上

欲宿心動而去

上問縣名為何曰柏人上曰柏人者迫于人也去弗宿事在八年至

是貫高怨家上變告之于是逮捕趙王敖及諸反者

趙午等皆自剄貫高獨怒罵曰公等皆死誰白王不

反者乃檻車

車上著板四周如檻形

膠致

膠密不得開送詣京師

詣長安

貫高對獄曰獨吾屬為之王實不知吏榜笞刺熱身

無完者終不復言廷尉以聞上曰壯士誰知者中大

夫

漢官掌議論

泄公

氏族略泄亦作洩

曰臣素知之此固趙國立

名義不侵為然諾者也上使泄公持節往問之復與

前

榜刺委因故以竹為與處之

仰視泄公勞苦如平生歡泄公因

問張王果有謀否高曰吾三族皆以論死豈愛王過

于吾親哉顧為王實不反獨吾等為之具道所以王

賈高以憤怒肇亂謀雖卒能證明其主不惜一死塞責然趙國由是以亡楊苜罪魁何賢之有荀悅曰小亮不塞大逆私行不贖公罪雖母赦可也斯言良當

不知狀泄公以報乃赦教廢為宣平侯徙代王如意

為趙王上賢高赦之高曰所以不死白張王不反耳

今王已出吾責已塞死不恨矣且人臣有篡弑之名

豈有面目復事上哉乃仰絕亢而死

先是詔捕趙王羣臣賓客敢從

者罪三族郎中田叔孟舒皆自髡鉗為奴以從及貫高事白上召見田叔等與語漢廷臣無能出其右者

盡拜為守相田叔趙

陘城人其先齊田氏

夏六月乙未晦日食

甲辰十年夏五月太上皇崩葬萬年

漢太上皇葬櫟陽北原因于櫟陽置萬年

縣以奉陵寢故城在今  
西安府臨潼縣東北

令諸侯王國各立廟于其都

以周昌

沛人苛之弟

為趙相趙堯為御史大夫

戚姬有寵嘗從上之關東日夜啼泣欲立其子如意

呂后年長希見益疎上以太子仁弱如意類已如意

已立為趙王留之長安欲廢太子而立之大臣固爭

皆莫能得御史大夫周昌廷爭之彊上問其說昌為

人吃

言之難也

又戚怒曰臣口不能言然臣期期知其不



可陛下欲廢太子臣期期不奉詔上欣然而笑即罷

呂后聞之跪謝昌曰微君太子幾廢

時趙王年十歲上憂萬歲之後不

全也獨心不樂悲歌符璽御史趙堯侍知上指乃請  
為趙王置貴彊相及呂后太子羣臣所敬憚者上問  
其人堯以昌對上乃以昌相趙而以堯代為御史大  
夫

九月代相陳豨

宛人

反帝自將討之

初陳豨以郎中封陽夏侯為代相監趙代兵豨嘗稱

慕魏公子無忌及將守邊多招致賓客告歸過趙賓客隨之者千餘乘趙相周昌求入見上具言旡賓客盛擅兵于外恐有變上令人覆案旡客諸不法事多連引旡旡恐陰令客通王黃曼邱臣所遂反自立為代王劫略趙代上聞乃自擊旡至邯鄲上喜曰旡不南據邯鄲而阻漳水吾知其無能為矣周昌奏常山亡二十城請誅守尉上曰守尉反乎對曰不上曰是力不足亡罪令昌選趙壯士可將者白見四人

白于天子

而合見也封各千戶以為將左右諫曰此何功上曰非汝

所知趙代地皆穽有吾徵天下兵未至今獨邯鄲中

兵耳吾何愛四千戶不以慰趙子弟又聞穽將皆故

賈人上曰吾知所以與之矣乃多以金間之穽將多

降明年將軍郭蒙擊破穽將張春等太尉

秦官漢因之掌武事

後為大司馬

周勃道太原屠馬邑上攻拔東垣

今正定府正定縣漢

初曰東垣後改今名

以千金購王黃曼邱臣皆生致之于是穽

軍遂敗

韓信之寬與否  
姑弗論然高祖  
在外而後公然  
族誅大臣固亦  
弗問北雖司展  
成何國政人咸  
之禍兆于此矣

乙十一年春正月皇后殺淮陰侯韓信夷三族

淮陰侯信舍人得罪于信信欲殺之其弟乃上變告  
前陳豨相代監邊辭信信辟左右曰公所居天下精  
兵處也而公陛下之信幸臣也人言公畔陛下必不  
信再至則疑矣三至必怒而自將吾為公從中起天  
下可圖也豨曰謹奉教今信陰與豨通謀欲與家臣  
夜詐赦諸官徒奴發以襲呂后太子后與蕭何謀詐  
令人從帝所來稱豨已破羣臣皆賀時信方稱疾何

紿信曰雖病彊入賀信入呂后使武士縛信斬之長

樂鐘室

懸鐘之室

信方斬曰悔不用蒯徹計反為女子所

詐豈非天哉遂夷信三族

上已破甗歸聞信死且喜且哀之問后曰信死亦何

言后道其語上曰此齊辯士蒯徹也詔捕之至問曰若教淮陰侯反耶對曰然豎子不用臣策故自夷于此上怒曰烹之徹曰秦失其鹿天下共逐之高材捷足者先得焉跖之狗吠堯堯非不仁狗固吠非其主當是時臣惟知韓信非知陛下也且天下欲為陛下所為者甚衆顧力不能耳豈可盡烹耶上曰置之

以蕭何為相國

上已聞韓信死使使拜丞相何為相國益封五千戶

令卒五百人一都尉為相國衛

衆皆賀召平獨弔謂何曰禍自此始矣上

暴露于外而君守于內非被矢石之事而益君封置衛者以淮陰新反于中有疑君心置衛衛君非寵君也願君讓封弗受以家私財佐軍何從其計上說是秋燕布反上自擊之何拊循百姓悉以所有佐軍如陳豨時客或說曰君位為相國功第一可復加哉何不多買田地賤賣貸以自污上心乃安何又從其計上益大悅召平故秦東陵侯秦破為布衣種瓜長安城東故後世謂之東陵瓜

韓王信伏誅

信引匈奴入居參合

漢縣故城在今山西大同府陽高縣東北將軍柴武

柴氏高柴之後以名為氏

遺信書令急自歸信報曰僕之思歸如

痿人不忘起盲者不忘視勢不可耳遂戰武擊斬之

後信子穉當及其太子之子嬰以衆降漢俱封列侯世貴顯

帝至洛陽立子恒

即文帝

為代王

帝以代地居常山之北與匈奴邊數被寇乃稍分山

南太原地以益之令羣臣擇可立為王者皆曰子恒

賢知溫良遂立以為代王都晉陽後徙中都

漢縣故城在今

山西汾州府平遙縣西北

二月立王侯朝獻郡國口賦法

詔曰欲省賦甚今獻未有程吏或多購以為獻而諸侯王尤多民疾之令諸侯王常以十月朝獻及郡各以其口數率

計之也

人歲六十三錢以給獻費

詔郡國求遺賢

詔曰蓋聞王者莫高于周文伯者莫高于齊桓皆待賢人而成名今天下賢者智能豈特古之人乎患在人主不交故也士奚由進今吾以天之靈賢士大夫定有天下以為一家欲其長久世世奉宗廟無絕也



賢人已與我共平之矣而不與我共安利之可乎賢

士大夫有肯從我遊者吾能尊顯之布告天下使明

知朕意御史大夫下相國相國下諸侯王御史中執

法

中丞也

下郡守其有意稱明德者必身勸為之駕

親身

教勸自為駕車

遣詣相國府有而弗言覺免年老癯病勿遣

梁王越廢徙蜀三月殺之夷三族

上之擊陳豨也徵兵于梁梁王稱病使將將兵詣邯

鄲上怒讓之梁王恐欲自往謝其將扈輒曰往則為

禽不如遂反王不聽梁太僕得罪亡走漢告之上使  
使掩捕梁王囚之洛陽有司奏反形已具請論如法

上赦以為庶人徙蜀青衣

本羌地漢置青衣道以青衣江名後改曰漢嘉縣今

四川雅州府雅安縣是也

至鄭

今陝西同州府華州鄭縣故城是

逢吕后從長安

來王為后涕泣自言無罪願處故昌邑后許諾與俱  
至洛陽白上曰彭王壯士今徙之蜀此自遺患不如

遂誅之妾謹與俱來乃令其舍人告越復謀反夷三

族梟首洛陽下

詔有收視者捕之梁大夫樂布使于齊還奏事彭越頭下祠而哭之吏捕

以聞上欲烹之方提超湯顧曰願一言而死上曰何  
言布曰方上之困彭城敗滎陽也王與楚則漢破與  
漢則楚破且垓下之會微彭王項氏不亡天下已定  
而陛下以苛小案誅滅之臣恐功臣人人自危也今  
彭王已死臣生不如死請就烹于是上乃釋布拜為都尉

立子恢為梁王友為淮陽漢淮陽國治陳今河南陳州府王

罷東郡頗益梁罷潁川郡頗益淮陽

夏四月帝還宮

五月立故秦南海秦郡注見前尉趙佗正定人為南粵王

初秦南海尉任囂病且死召龍川今縣屬廣東惠州府令趙佗

語曰秦為無道天下苦之聞陳勝等作亂天下未知

所安番禺

秦南海郡治番禺今廣東廣州府番禺南海二縣是

負山險阻南海

東西數千里頗有中國人相輔此亦一州之主也可

以立國即被佗書行南海尉事驚死佗即移檄關隘

絕道

絕秦所開越道

聚兵因稍以法誅秦吏擊并桂林象郡

注俱見前

自立為南越武王至是詔立為南越王使陸賈

即授璽綬與剖符通使使和集百越無為南邊患害

賈至佗以璽

音推

結

音計為髻一撮似推夷俗也

箕踞見之賈曰足

下中國人親戚墳墓皆在正定今反天性棄冠帶欲以區區之越與天子抗衡為敵國禍且及身矣夫秦失其政豪傑並起唯漢王先入關項羽倍約遂誅滅之五年之間海內平定此非人力天所建也今天子憐百姓新勞苦且休之遣使授君王印剖符通使君王宜郊迎北面稱臣乃欲以新造未集之越屈彊于此漢誠聞之掘燒君王先人冢夷滅家族使一偏將將十萬衆臨越則越殺王降漢如反覆手耳于是佗

乃蹶然起坐謝曰居蠻夷中久殊失禮義留賈與飲  
數月曰越中無足與語至生來我今日聞所不聞賜  
橐中裝直千金他送亦千金賈卒拜佗令稱臣奉漢  
約歸報帝大悅拜賈為大中大夫

賈時時前說稱詩書帝罵之曰乃公

居馬上得之安事詩書賈曰馬上得之寧可以馬上治乎且湯武逆取而以順守之文武並用長久之術也向使秦已并天下行仁義法先聖陛下安得而有之帝有慙色曰試為我著秦所以失天下吾所以得之者及古成敗之國賈著十二篇每奏一篇帝未嘗不稱善號其書曰新語

帝有疾

帝有疾惡見人詔戶者無得入羣臣十餘日舞陽

今縣

蜀河南  
南陽府

侯樊噲排闥直入大臣隨之上獨枕一宦官

卧噲等流涕曰始陛下與臣等起豐沛定天下何其  
壯也今天下已定何其憊也且陛下病甚大臣震恐  
不見臣等計事顧與一宦者卧豈不見趙高之事乎  
帝笑而起

秋七月淮南王布反帝自將討之立子長為淮南王

布平

之國治

壽春

初淮陰侯死布心已恐及彭越誅醢其肉以賜諸侯  
布見醢大恐陰令人部聚兵侯伺旁郡警急有中大  
夫賁音肥赫得罪于布乘傳詣長安上變言布謀反有

端上繫赫使人驗之布遂族赫家發兵反反書聞汝

陰

漢縣今曰阜陽為  
江南潁州府治

侯滕公以問其客薛公

故楚  
今尹薛

公曰往年殺彭越前年殺韓信此三人者同功一體  
之人也自疑禍及身故反爾滕公言于上上召薛公  
問之對曰布反不足怪使布出于上計山東非漢



有也出于中計勝敗之數未可知也出于下計陞  
下高枕而卧漢無事矣上曰何謂也對曰東取吳  
西取楚并齊取魯傳檄燕趙固守其所此上計也  
東取吳西取楚并韓取魏據敖倉之粟塞成臯之  
口此中計也東取吳西取下蔡

即春秋州  
來注見前歸重于

越身歸長沙此下計也上曰是計將安出對曰布  
以驪山之徒自致萬乘此皆為身不顧後慮者也  
必出下計上曰善封薛公千戶立子長

故趙王敖  
所進美人

子方為淮南王時上有疾欲使太子擊布太子三歲

客東園公

姓唐字宣明居園中因號

綺里季

姓氏未計

夏黃公

姓崔名廣

字少通齊人隱居夏里故號夏黃公

角里先生

河內軹人姓周名術字元道

四人

所謂四皓也避秦亂隱于商山呂后以留侯計使建成侯呂釋之奉太子書卑辭厚禮迎之四人皆

至商山在商州東有七盤十二碑

說建成侯呂釋之曰太子將兵

有功則位不益無功則從此受禍矣君何不急請

呂后乘間為上泣言黥布猛將善用兵諸將皆陸

下故等夷乃令太子將此屬無異使羊將狼且使

布聞之則鼓行而西耳后如其言上曰吾惟監子固

不足遣而公自行耳於是上自將而東

羣臣皆送至霸上留

侯病強起見上曰臣宜從病甚楚人剽疾願上無與爭鋒因說上令太子為將軍監闔中兵上曰子房雖病彊卧而傳之時叔孫通已為太傅留侯行少傳事布之初反謂帝老厭

兵必不能來諸將淮陰彭越已死餘不足畏故遂

反果如薛公之言東擊荊荆王賈走死擊楚楚與

戰徐

注見前

僮

漢縣故城在江南鳳陽府虹縣東北

間軍敗

楚為三軍欲以相救

為奇或曰兵法諸侯自戰其地為散地今別為楚三彼敗吾一軍餘皆走安能相救不聽果敗

王交走薛

注見前

布遂引兵西

兩十二年冬十月帝破布軍于蘄西布亡走長沙王

臣

吳芮子嗣王

誘而誅之

上與布軍遇于會甄

邑名徐廣曰在蘄西會攻外反甄文瑞反

布兵甚

精上望其置陳如項籍軍惡之遙見布謂曰何苦

而反布曰欲為帝耳上怒罵之遂大戰布軍敗渡

淮走江南長沙王臣使人誘與走越殺之

帝還過沛復其民及豐

上還過沛留置酒沛宮悉召故人父老子弟佐酒發  
沛中兒得百二十人教之歌酒酣上擊筑自歌曰大  
風起兮雲飛揚威加海內兮歸故鄉安得猛士兮守  
四方令兒皆和習之上乃起舞慷慨傷懷泣數行下  
謂沛父兄曰遊子悲故鄉吾雖都關中萬歲後吾魂  
魄猶思沛且朕自沛公以誅暴逆遂有天下其以沛  
為朕湯沐邑復其民世世無有所與沛父老諸故入  
日樂飲極歡道  
故舊為笑樂  
沛父老皆頓首曰沛幸得復豐未得唯  
十餘日乃去

陸下哀矜上曰豐者吾所生長極不忘耳特以其為  
雍齒故反我為魏沛父兄固請之乃并復豐比沛

太尉周勃誅陳豨定代地

勃斬豨于當城

漢縣故城在大同府陽高縣界

悉定代郡雁門雲中

地

立兄子濞為吳王

荆王既死

事見前

無後更以荆為吳國立兄仲之子沛

侯濞為吳王已拜上召濞謂曰汝狀有反相因附其

背曰漢後五十年東南有亂豈汝耶然天下同姓一家汝慎毋反漢頓首曰不敢

### 十一月過魯以太牢祀孔子

尹氏起莘曰漢高之興以馬上得天下不事詩書然過魯祠孔子乃見于兵戈倥偬之日自是而後除挾書律置博士官開獻書路儒道稍稍振起蓋實基于此

### 帝還宮

上還長安疾益甚愈欲易太子張良諫不聽因辭疾不視事叔孫通諫曰晉獻公以驪姬故廢太子國亂

四時調護太子  
其事不足深信  
豈有張良叔孫  
通輩死爭不得  
而四老翁轉得  
持其短長者杜

數十年秦以不蚤定扶蘇自使滅祀今必欲廢嫡而

立少臣願先伏誅以頸血汚地帝曰公罷矣吾直戲

耳通曰太子天下本一搖天下震動奈何以天下

為戲乎時大臣固爭者多上知羣臣心皆不附趙王

乃不易太子

史記留侯世家上破布歸置酒太子侍東園公等四人從年皆八十餘鬚眉皓

白衣冠甚偉

上怪問之四人前對各言姓名上乃大

驚曰吾求公數歲公避逃我今何自從吾兒遊四人

皆曰陛下輕士苦罵臣等義不辱竊聞太子仁孝恭

敬愛士天下莫不延頸欲為太子死故臣等來耳上

曰頃公幸卒調護太子四人為壽已畢起去上目送

之召戚夫人指示四人者曰我欲易之彼四人輔之



牧安劉祗劉林  
古引而未發其  
高帝報知人其  
論王陵陳平周  
勃及吳王漢於  
十數年之後乃  
如觀火豈有不  
知已子之理思  
帝柔懦不足以  
承重器帝蓋早  
已見及故欲易  
之耳漢愛戚姬  
欲立乳嬰乃信  
其失使高帝廢  
意而立文呂與  
薄亦必不能相

羽翼已成難動矣戚夫人泣上曰為我楚舞我為若  
楚歌歌曰鴻鵠高飛一舉千里羽翮已就橫絕四海  
橫絕四海當可奈何雖有繒繳尚安可施軟數闕戚夫  
人嗟唏流涕上起罷酒竟不易太子留侯招四人之功  
也通鑑考異曰高祖特以大臣皆不肯從恐身後  
趙王不能獨立故不為耳豈四叟片言遽能挽其事  
乎此辨士欲誇大四叟之事故遂云  
然司馬遷好奇多愛而採之今不取

### 下相國何廷尉獄已赦出之

蕭何以長安地陋上林中空地棄請令民得入田  
毋收萊為獸食上大怒下廷尉械繫之王衛尉侍前  
問曰相國何大罪陛下繫之暴也上曰吾聞李斯相

和然文帝必能  
調停其間無呂  
氏之亂而劉氏  
無矣故見患之  
不可是帝之明  
終不憂受猶帝  
之正而還回於  
嫡庶之虛名使  
漢室有幾危之  
賢禍則帝之失  
高祖有知必當  
首肯吾言史遷  
好奇附會之說  
不必論矣

秦有善歸主有惡自與今相國多受賈豎金為請吾  
苑以自媚于民故繫治之王衛尉曰夫職事苟有使  
于民而請之真宰相事也陛下奈何乃疑相國受賈  
人錢乎且陛下距楚數歲相國一搖足則關以西非  
陛下有也相國不以此時為利而利賈人之金乎且  
秦以不聞其過亡天下李斯之分過又何足法哉上  
不憚即赦出之

何年老素恭謹徒跣入謝上曰相國  
休矣相國為民請苑不許我不過為

桀紂主而相國為賢相吾故  
繫相國欲令百姓聞吾過也

燕王綰謀反春二月遣樊噲以相國將兵討之立子建為燕王

陳豨之反燕王綰發兵擊其東北以豨求救于匈奴亦使其臣張勝于匈奴為言豨軍已破故燕王臧荼子衍在胡謂勝曰燕所以久存以諸侯數反兵連不決也今公欲急滅豨豨亡次亦至燕矣勝以為然還告綰綰乃陰使勝為間于匈奴而使范齊通計謀于豨欲令久亡連兵勿決至是豨裨將降言之帝召綰

綰恐謂其幸臣曰非劉氏而王獨我與長沙耳往年族淮陰誅彭越皆呂氏計今上病呂氏專欲以事誅異姓之王者及大功臣遂稱病不行語頗泄上聞之怒又得匈奴降者言張勝為燕使胡狀于是上曰綰果反矣使樊噲將兵擊之

詔陳平斬樊噲以周勃代將其軍平傳噲詣長安

帝病甚人或言噲黨于呂氏即一日上晏駕欲以兵誅趙王如意之屬帝大怒用陳平謀召絳侯周勃受

讀史者於漢高  
帝論諸曹諸人  
事謂帝蓋預知  
呂氏之禍者然

詔牀下曰陳平馳傳載勃代噲將至軍中即斬噲頭  
二人行計之曰噲帝之故人也功多又呂后弟類之  
夫有親且貴今帝特以忿怒故欲斬之恐後悔寧因  
而致上上自誅之未至軍為壇以節召噲反接載檻  
車傳詣長安令勃代將定燕反縣

### 夏四月帝崩

上擊黥布時為流矢所中行道疾疾甚呂后迎良醫  
醫入見曰疾可治上嫚罵之曰吾以布衣提三尺取

此好奇而不能  
鑑之於理矣蕭

寶策與帝同起

忠難固宜知之

甚愚若呂氏恐

難狼籍難移漢

祚則曰後日時

至事起非帝所

能逆觀使誠先

見及此即廢呂后

立趙王抵分羹

之忍何不可為

顧肯隱忍自釀

重禍哉昔周

關史記書事及

之并揭大指于

天下非天命乎命乃在天雖扁鵲

姓秦氏名越人  
勃海郡人也

何

益罷之后問陛下百歲後蕭相國死誰令代之曰曹

參其次曰王陵然少戇陳平可以助之平智有餘然

難獨任周勃厚重少文然安劉氏者必勃也可令為

太尉復問其次曰此後亦非乃所知也四月甲辰崩

于長樂宮

通鑑考異曰據漢書云呂后與審食其謀  
將盡族諸將酈商見食其曰聞帝已崩不

發喪欲誅諸將誠如此天下危矣今陳平灌嬰守滎

陽樊噲周勃定燕代聞此必連兵還鄉亡可蹻足待  
也乃以丁未發喪按呂氏雖暴戾亦安敢一旦盡誅  
大臣且其時陳平不在滎陽樊噲亦不在代此說不

足據

盧綰亡入匈奴

綰悉將其宮人家屬騎數千居長城下候伺幸上病

瘡自入謝會帝崩綰遂亡入匈奴

匈奴以為東胡盧王為蠻夷所侵奪

常思復歸居歲餘死胡中

五月葬長陵

在西安府咸陽縣東陵之北有廢城即漢長陵縣也

高祖不修文學而性明達好謀能聽自監門戍卒見之如舊初順民心作三章之約天下既定令蕭何次

律令韓信申軍法張蒼

陽武人

定章程叔孫通制禮儀

又與功臣剖符作誓丹書鐵券石室金匱藏之宗廟  
雖日不暇給規模宏遠矣

太子盈即位

是為孝惠帝

尊皇后曰皇太后

赦樊噲復爵邑

陳平既執樊噲行聞帝崩恐呂嬖譏之乃馳傳先去  
逢使者詔平與灌嬰屯滎陽平受詔立復馳至宮哭



殊哀因固請得宿衛中太后乃以為郎中令

秦官漢因之掌

宮殿掖門戶

使傳教帝呂嬃讒乃不得行噲至太后即釋

之并復爵邑

令郡國立高廟

孝惠皇帝

丁未元年冬十二月太后殺趙王如意

太后令永巷囚戚夫人髡鉗衣赭衣令舂

戚夫人舂且歌曰子

為王母為虜終日春薄暮常與死相伍相離三千  
里誰當使告女太后聞之大怒曰乃欲倚汝子耶  
名

幾諫幹蠱常人  
尚應勉豈有身  
為人主宗社所  
繫而不能善處  
家庭之理淫樂  
不聽政遂以自

趙王如意三反相周昌曰高帝屬臣趙王聞太后欲  
誅之臣不敢遣王亦病不能奉詔太后怒召昌至復  
召趙王王來帝自迎入宮挾與起居飲食太后欲殺  
之不得間帝晨出射趙王少不能早起太后使人持  
酖飲之

周昌謝病不朝見三  
歲而卒諡曰悼侯

遂斷戚夫人手足去眼

燁耳飲瘡藥使居廁中命曰人彘召帝視之帝驚大  
哭因病歲餘不能起使人謂太后曰此非人所為  
臣為太后子終不能治天下遂曰飲為淫樂不聽政

賤命而呂雉  
之禍興矣惠帝  
實高祖之罪臣  
敗子耳

徙淮陽王友為趙王

趙王如意既酖死

諡曰隱

乃徙友王趙

春正月城長安

是年始城西北方三年春正月

發長安六百里內男  
女十四萬六千人

夏六月

發諸侯王列侯  
徒隸二萬人

再城之五年春正月

發六百  
里內男

女十四萬  
五千人

復城之其秋乃成

三輔黃圖長安城周迴  
六十五里城南為南斗

形北為北斗形至  
今人呼之曰斗城

戊申二年冬十月齊王肥來朝

欽定四庫全書

御批歷代通鑑輯覽

三九

帝與齊王燕飲太后前置齊王上坐如家人禮太后

怒迺令人酌兩卮醵酒置前令齊王為壽齊王起帝

亦起欲俱為壽太后恐自起反

音幡覆也

卮齊王怪之因

不敢飲陽醉去問知其醵乃憂自以為不得脫長安

用內史士

內史王官士名也

言獻城陽郡

注見前

為魯元公主

湯沐邑乃得歸

春正月雨龍見蘭陵

注見前

井中

隴西

漢郡治狄道今甘肅蘭州府狄道州是

地震

夏旱

秋七月相國鄴侯蕭何卒

諡曰文終

以曹參為相國

相國何病上親自臨視因問曰君即百歲後誰可代

君對曰知臣莫若主上曰曹參何如何頓首曰帝得

之矣臣死不恨七月卒

何買田宅必居窮僻處為家不治垣屋曰今後世賢師吾

儉不賢毋為勢家所奪

參聞何卒告舍人趣治行曰吾且入相

居無何果召參

參去屬其後相曰以齊獄市為寄慎勿擾也後相曰治無大于此者乎參

曰獄市所以并容也今擾之姦人安所容乎吾是以先之

始參徵時與蕭何善及

為將相有隙至何且死所推賢惟參參代何為相國

舉事無所變更一遵何之約束擇郡國吏長大

取年長大

也訥于文辭謹厚長者即召除為丞相史史言文刻

深欲務聲名輒斥去之

日夜飲醇酒卿大夫以下吏及賓客見參不事事皆欲有

言至者參輒飲以醇酒莫得聞說

見人有細過掩匿覆蓋之府中無

事子密為中大夫帝怪參不治事使密私問之參怒

咎密曰趣入侍天下事非若所當言也至朝時帝讓

參曰乃者我使諫君也參免冠謝曰陛下自察聖武

惠帝方以呂后故淫樂不聽政而參復濟之以飲醇其去君臣相與沉湎者幾希特以漢初削平大難人心厭亂幸免耳清靜

寧一之辭非公  
論也

孰與高帝上曰朕安敢望先帝曰臣孰與蕭何賢上  
曰君似不及也參曰陛下言是也高帝與蕭何定天  
下法令既明今陛下垂拱參等守職遵而勿失不亦  
可乎帝曰善

已  
三年春與匈奴和親

匈奴冒頓寢驕為書遺太后辭極褻嫚后怒議斬其  
使發兵擊之樊噲曰臣願得十萬眾橫行匈奴中季  
布曰噲可斬也前匈奴圍高帝于平城漢兵三十二  
萬而季布曰可  
斬是藉口息事

不顧損威失重  
者之長技然則  
如之何而後可  
曰度力力勝則  
征之力不勝則  
自守尚可報書  
遜謝有是理哉  
然彼已與塞食  
其為亂冒頓果  
至彼亦從之耳  
獨其時之羣臣  
黜顏不愧而猶  
以布言為足焉  
不亦大可笑乎

萬噲為上將軍不能解圍天下歌之曰平城之下亦  
誠苦七日不食不能穀弩今歌噍未絕傷痍甫起而  
噲欲搖動天下妄言以十萬衆橫行是面謾也且匈  
奴即善言不足喜惡言不足怒也太后曰善令報書  
遜謝遣以車馬冒頓復使來謝曰未嘗聞中國禮義

陛下幸而赦之因獻馬遂和親

以宗室女為公主嫁之

夏五月立閭越君搖

句踐之裔與無諸同姓

為東海主

搖與無諸俱率百越之衆從諸侯入秦高祖已王無



諸在五年至是更舉越功乃立搖為東海王都東甌

事見前

今浙江温州府永嘉縣西南有東甌城搖所都世號曰東甌王

庚戌四年冬十月立皇后張氏

后帝姊魯元公主女也太后欲為重親故以配帝

春正月舉民孝弟力田者復其身

三月帝冠赦天下

除挾書律

張晏曰秦律故有挾書者族

立原廟

師古曰原重也先已有廟今更立之故云重也

帝以朝長樂宮

太后居長樂

數蹕煩民乃築複道武庫南

叔孫通諫曰此高帝月出遊衣冠

師古曰從高帝陵寢出衣冠遊于高

廟月一之道也子孫奈何乘宗廟道上行哉帝懼曰

叔孫通所謂導其主以飾非文過也孟子逢君之誅不能免矣

急壞之通曰人主無過舉今已作百姓皆知之矣願

陛下為原廟于渭北衣冠月出遊之益廣宗廟大孝

之本乃詔有司立原廟

帝常出遊離宮通曰古者有春嘗菜方今櫻桃熟可獻宗

廟上許之諸菓獻由此興

宜陽

注見前

雨血

辛  
亥 五年冬雷桃李華棗實

夏大旱

江河水少谿谷水絕

秋八月相國平陽侯曹參卒

諡曰懿

參為相三年卒百姓歌之曰蕭何為法較若畫一曹參代之守而勿失載其清靜民以寧壹

壬  
子 六年冬十月以王陵為右丞相陳平為左丞相

夏留侯張良卒

諡曰文成

良常謝病辟穀學道欲輕舉高帝崩呂后德良乃彊食之曰人生一世間如白駒之過隙何自苦如此良

不得已彊聽食至是卒

良亡匿下邳時遊北上遇一老父出一編書曰讀是則為

王者師後十年興十三年見我濟北穀城山下黃石即我已後十三歲從高帝過濟北果得穀城山下黃石取而寶祠之又良死并葬黃石

以周勃為太尉

勃為人木彊敦厚高帝以為可屬大事前已遷太尉擊陳豨既定燕歸高帝已崩以列侯事上至是更置

辟強揣度之詞  
平勃遽為聽用  
以張諸呂之權  
是平勃乃高祖  
之罪人而辟疆  
又平勃之罪人  
也馴至稱制封  
王無不隱忍曲

太尉官

漢初太尉官不常設

以勃為之

癸丑

七年春正月辛丑朔日食

夏五月丁卯日食既

秋八月帝崩

太后使呂台

周呂侯澤之子

呂產

台之弟

將南北軍

漢衛宮之兵在城內者為

南軍宮衛主之京城之軍則為北軍京中尉主之

帝崩太后哭而泣

淚也

不下留侯子辟疆

年十五為侍中

謂陳

平曰太后獨有帝今哭而不哀君知其解未平曰何

就直至呂氏死而後安劉之言始驗柔奸自全者流方且謂智者侯時大丈夫觀之不值一嘆唐狄仁傑之事與平勃同此予所謂如此安劉孰不能者也孝惠論已具前史臣語非至當

解辟疆曰帝無壯子太后畏君等今請拜呂台呂產

為將居南北軍諸呂皆居中用事則太后心安君等

幸脫禍矣從之太后哭乃哀呂氏權由此起

九月葬安陵

在咸陽縣東北去長陵十里漢置縣晉廢

史臣曰孝惠內修親親外禮宰相可謂寬仁之王遭呂太后廢損至德悲夫

太子即位太后臨朝稱制

師古曰制非皇后所得稱今太后行天子事故曰稱制

張皇后無子太后使陽為有身取後宮美人子名之

殺其母以為太子至是即位

甲高皇后呂氏元年汪克寬書法曰既有少帝曷為寅以高皇后之年紀之少帝他人子而呂后則漢太后也故以呂氏紀元不以他人子亂正統也然則曷為不予歲下大書女后稱制天下之大變故特變例書之  
冬十一月太后呂氏以王陵為帝太傅陳平為右丞相  
審食其為左丞相任敖沛人為御史大夫

太后欲立諸呂為王王陵曰高帝刑白馬而誓曰非劉氏而王者天下共擊之陳平周勃曰高帝定天下

王子弟今太后稱制王諸呂無所不可及退陵讓平勃曰始與高

帝歟血盟諸君不在耶今欲阿意背約何面目見高帝地下乎平勃曰面折廷爭臣不如君全社稷定劉

氏之後君亦不如臣

于是太后以陵為帝太傅實奪之相權陵

遂謝病免

杜門竟不朝請十年而薨

乃以平為右丞相

呂頤以平前執契璲

數譏之曰平為丞相不治事日飲醇酒戲婦人太后不聽太后多立諸呂為王平偏聽之

審食其

為左丞相

食其沛人楚取太上皇呂后為質食其以舍人從得幸于太后及為相不治事監宮

中如郎中令公卿百官皆因決事

太后又怨趙堯

為定趙王如意之策事見前

乃

抵堯罪上黨守任教常有德于太后

教初為沛獄吏高祖常避吏吏

繫呂后遇之不謹教怒擊傷主太后更故德之

遂以為御史大夫

太后追尊父呂公為宣王兄譚為悼武王



欲以王諸呂為漸也

春正月除三族罪妖言令二月置孝弟力田二千石者

一人

夏四月太后立張偃為魯王

魯元公主卒封公主子偃為王諡公主曰魯元太后

太后封山朝武為列侯立彊為淮陽王不疑為恒山

今直

隸正定府漢恒山郡王  
避文帝諱改常山

皆他人子太后名之為孝惠子

彊立五年卒以  
武為淮陽王

太后立呂台為呂王

太后使大謁者張釋風大臣大臣乃請割齊之濟南

郡為呂國立台為王明年卒

諡曰肅  
子嘉嗣

秋桃李華

乙卯

二年春正月地震武都道山崩

漢書地理志縣有蠻夷曰道武都本羌地

故城在今甘肅  
階州成縣西

夏五月太后封齊王

名襄悼惠  
王肥之子

弟章為朱虛

漢縣故城  
在今山東

青州府  
臨朐縣侯

令章入宿衛以呂祿女妻之

後太后復以章弟興居為東牟侯入宿衛

六月丙戌晦日食

秋七月恒山王不疑卒太后立襄成侯山為恒山王更名義

丙辰三年夏江漢水溢

流四千餘家是秋伊洛汝水皆溢

秋星晝見

丁巳四年夏四月太后封女弟類為臨光侯

太后廢少帝幽殺之五月立恒山王義為帝以朝為恒山王

少帝自知非皇后子乃出言曰后殺吾母我壯即為變太后幽之永巷中謂羣臣曰帝病久迷惑昏亂不能治天下其議代之羣臣頓首奉詔遂廢殺之立義為帝更名宏不稱元年以太后制天下事故也

戊午 五年春南越王佗反

時有司請禁粵關市鐵器佗曰高皇帝立我通使物

今高后聽讒臣別異蠻夷隔絕器物此必長沙王計  
欲倚中國擊滅南海并王之自為功也乃自號為南  
越武帝發兵攻長沙敗數縣而去

巳未六年冬十月太后廢呂王嘉立台弟產為呂王

春星晝見

庚申七年春正月太后幽殺趙王友

友以諸呂女為后弗愛女怒去讒之太后曰王言呂  
氏安得王太后百歲後吾必擊之太后召友至郎令

衛守之友餓而作歌遂幽死

己丑日食晝晦

太后見日食惡之曰此為我也

二月太后徙梁王恢為趙王呂王產為梁王立太為濟

川

胡三省注濟川濟南濟北之地

王

產不之國為帝太傅太亦太后所名孝惠子也

太后封營陵

即營邱注見前

侯澤為琅邪

注見前王

澤高祖從祖昆弟其妻呂嬃女也齊人田生為之說

大謁者張釋曰諸呂之王也大臣未服今營陵侯澤

諸劉長為大將軍王之諸呂益固矣張釋言之乃割

齊之琅邪郡封澤為王

田生與琅邪王之國勸急行勿留出關太后果使人追之

已出使

遂還

趙王恢自殺太后立呂祿為趙王

太后以呂產女為趙王恢后王有愛姬王后酖殺之

王悲憤自殺太后以為用婦人故自殺無思奉宗廟

禮廢其嗣

使使告代王恒欲徙王趙代王謝願守代邊

乃立兄子祿為趙

王

是時諸呂擅權用事朱虛侯章年二十有氣力忿劉氏不得職嘗入侍燕飲太后今為酒吏章自請

曰臣將種也請得以軍法行酒太后曰可酒酣章請言耕田太后曰試為我言田意章曰深耕耨種立苗欲疏非其種者鋤而去之太后默然頃之諸呂有一人醉亡酒章追拔劍斬之還報太后左右皆大驚業已許其軍法亡以罪也自是諸呂憚之陳平患諸呂力不能制嘗燕居深念陸賈往直入坐而平不見賈曰何念之深也平曰生揣我何念賈曰足下極富貴無欲矣不過患諸呂少主耳平曰然奈何賈曰天下安注意相天下危注意將將相和調則士豫附天下雖有變權不分為社稷許在兩君掌握耳君何不交驩太尉因為平畫呂氏數事平用其計兩人深相結呂氏謀益衰

秋九月燕王建卒太后殺其子國除



辛酉 八年冬十月太后立呂通台之子為燕王

夏江漢水溢

流萬餘家

秋七月太后呂氏崩遺詔產為相國祿女為帝后審食其為帝太傅

先是太后被遷過軹道

注見前

見物如蒼太擻

謂拘特之也

太后掖忽不復見卜之云趙王如意為祟遂病掖傷病甚乃令祿為上將軍居北軍產居南軍誠曰呂氏

之王大臣弗平我崩大臣恐為變必據兵衛宮慎勿送喪為人所制七月崩于未央宮

齊王襄發兵討諸呂相國產使大將軍灌嬰擊之嬰屯滎陽與齊連和

諸呂欲為亂未敢發朱虛侯以呂祿女為婦知其謀乃陰令人告其兄齊王襄令發兵西已為內應以誅諸呂立齊王為帝于是齊王悉發國中兵使內史祝午黃帝之後封紹琅邪王澤午謂琅邪王曰呂氏為亂齊王發兵欲西誅之

齊王自以年少不習兵事願舉國委大王請大王幸之臨淄與齊王計事琅邪王信之西馳見齊王齊王因留之而使發其兵并將之西攻濟南

本齊郡太后割以為呂國

遺諸侯王書陳諸呂罪曰寡人率兵入誅不當為王者產祿聞使大將軍灌嬰將兵擊之嬰至滎陽謀曰諸呂欲危劉氏今我破齊還報是益呂氏資也乃留兵屯滎陽使人諭齊王與連和以待呂氏變共誅之王乃還兵西界待約

九月太尉勃丞相平朱虛侯章誅產祿及諸呂齊王灌

嬰兵皆罷

時產祿居南北軍太尉勅不得主兵曲周侯酈商老病其子寄與祿善勃乃與丞相平謀使人劫商令寄紹說祿曰高帝與呂后共定天下劉氏所立九王呂氏所立三王皆大臣之議諸侯王亦以為宜今太后崩帝少而足下不急之國乃將兵留此為大臣諸侯所疑何不歸將印以兵屬大尉請梁王亦歸相印與大臣盟而之國齊兵必罷足下高枕而王千里此萬世之利也祿善其計諸呂老人

或以為不便猶豫未決

祿信寄時與出涕過其姑呂  
類類大怒曰若為將而棄軍

呂氏今無處矣乃悉出珠玉寶  
器散堂下曰毋為他人守也

九月平陽侯窋

曹參子

行御史大夫事見產計事會郎中令賈壽

晉賈季食  
邑于賈其

後以使從齊來具以灌嬰與齊楚合從告產且趣產

急入宮窋聞其語馳告平勃勃欲入北軍不得襄平

漢縣故城在奉  
天府遼陽州

侯紀通

紀成子

尚

主也

符節乃令持節矯

內讀作  
納

太尉北軍復令寄語祿解將軍印以兵授勃

勃入軍門令曰為呂氏右袒為劉氏左袒軍中皆左

袒然尚有南軍平乃召朱虛侯章佐勃勃令章監軍  
門令密告衛尉毋入產殿門產欲入宮為亂至殿門  
弗得入徘徊往來密馳告勃勃尚恐不勝未敢公言  
誅之乃謂章曰急入宮衛帝予卒千餘人章入宮門  
見產廷中遂擊殺之帝遣謁者持節勞章章欲奪其  
節不得則從與載因節信馳走斬長樂衛尉呂更始  
還報勃勃起拜賀遂遣人分部悉捕諸呂男女無少  
長皆斬之使人誅燕王通

時通已  
之國

而廢魯王張偃遣

章告齊王罷兵灌嬰亦罷歸

諸大臣迎立代王恒後九月至即位

是為文帝

誅呂后所名

孝惠子赦

諸大臣謀曰呂后所立帝及諸王皆非真孝惠子也

呂后詐取他人子而立之以彊呂氏今皆以夷滅諸呂而所

立即長用事吾屬無類矣或言齊王高帝長孫可立大臣

皆曰呂氏幾危宗廟今齊王舅駟鈞虎而冠即立齊王復

為呂氏吳代王高帝子於今見在最為長仁孝寬厚太后家

薄氏謹良乃召代王代郎中令張武等曰漢大臣習

兵多詐願稱疾毋往以觀其變中尉宋昌

史記索隱  
昌宋義孫

曰秦失其政豪傑並起卒踐天子位者劉氏也天下

絕望一矣高帝王子弟地天才相制此所謂磐石之

宗也天下服其彊二矣除秦苛政約法令施德惠人

人自安難動搖三矣夫以呂太后之嚴立三王擅權

制然而太尉以一節入北軍一呼士皆左袒此乃天

授非人力也今大臣雖欲為變百姓弗為使故用天



下之心而歡迎立大王大王勿疑也代王下之吉

北傳

大橫占曰大橫庚庚余為天王夏啓以光代王曰易人固已為王又何王乎卜人曰所謂天王者乃天子

也

乃遣太后弟昭往見勃勃等具言所以迎立王者

昭還報王乃命昌驂乘張武等六人乘傳從詣長安

至渭橋

故渭橋在西要府故長安城北今廢

羣臣拜謁稱臣王下車答

拜太尉勃進曰願請問昌曰所言公公言之所言私

王者無私勃乃跪上天子璽符王謝曰至邸而議之

後九月晦至邸丞相平等皆再拜言日子宏等皆非

孝惠帝子不當奉宗廟大王高帝長子宜為嗣願大  
王即天子位王西鄉讓者三南鄉讓者再遂即位東  
牟侯興居曰誅呂氏臣無功請得除宮乃與太僕滕  
公入宮載呂后所立帝出奉法駕迎帝即夕入未央  
宮夜拜宋昌為衛將軍鎮撫南北軍以張武為郎中  
令行殿中有司分部誅呂后所立帝及諸王子即帝  
還坐前殿夜下詔書赦天下

御批歷代通鑑輯覽卷十三

欽定四庫全書

御批歷代通鑑輯覽卷十四

漢

太宗孝文皇帝

名恒高祖中子母曰薄姬

先在魏許負相曰當生天子後入漢高祖內之後宮

一目召幸之姬曰昨夢蒼龍據吾腹高祖曰此貴徵也吾為汝成之遂生帝

初封代王大

臣既誅諸呂遂迎立之

壬戌元年十月帝謁高廟

尊太后為皇太后

遣車騎將軍  
薄昭迎于代

立趙幽王

故趙王友

子遂為趙王徙琅邪王澤為燕王

初齊王襄起兵給琅邪王澤留之

前事具

澤不得反國

乃之長安與諸大臣共立帝以功徙為燕王瑯邪復

歸齊

以陳平為左丞相周勃為右丞相灌嬰為大尉

陳平謝病上問之平曰高祖時勃功不如臣及誅諸

呂臣功不如勃願以右丞相讓勃上從之于是論誅

諸呂功右丞相勃以下益戶賜金各有差

勃朝罷趨出意得甚

上禮之恭嘗目送之郎中袁盎進曰丞相何如人也上曰社稷臣也盎曰丞相功臣非社稷臣夫社稷臣主在與在亡興亡方呂氏時劉氏不絕如帶丞相為太尉本兵柄不能正呂后崩大臣共誅諸呂丞相適會其成功今丞相如有驕色而陛下謙讓臣主失禮竊為陛下不取也後朝上益莊丞相益畏袁盎字絲楚人

十二月除收孥相坐律令

應劭曰秦法一人有罪并坐其室家今除此律

詔曰法者治之正也今犯法已論而使無罪之父母妻子同產坐之及為收孥朕甚不取其議之有司皆曰收孥相坐所以累其心使重犯法如故便上曰朕

聞法正則民慙罪當則民從且夫牧民而導之善者吏也其既不能導又以不正之法罪之是反害于民為暴者也朕未見其便于是有司奉詔除收斂諸相坐律令

春正月立子啟為皇太子

即景帝

有司請早建太子上曰朕既不德縱不能博求天下賢聖有德之人而禪天下焉而曰豫建太子是重吾不德也其安之有司曰豫建太子所以重宗廟社稷

不忘天下也古者殷周有國治安皆且千歲用此道也立嗣必子所從來遠矣今子啟最長純厚慈仁請建為太子上乃許之

三月立太子母竇氏

風俗通夏帝相后緡方娠遭寒氏之難逃出自竇生少康其支孫以

竇為氏為皇后

后觀津人呂后時以良家子選入宮後呂后出宮人分賜諸王后入代生景帝

后兄長君弟廣國

字少君幼為人所畧賣傳十餘家間皇后立乃上書自陳召見驗問

得實厚賜田宅家于長安周勃灌嬰等曰吾屬不死命

且懸此兩人兩人所出微不可不為擇師傳賓客又

復效呂氏也乃選士有節行者與居兩人由此為退讓君子不敢以尊貴驕人

詔定振窮養老之令

詔曰方春和時草木羣生之物皆有以自樂而吾百姓鰥寡孤獨窮困之人或陷于死亡而莫之省憂為民父母將何如其議所以振貸之又曰老者非帛不暖非肉不飽今歲首不時使人存問長老又無布帛酒肉之賜將何以佐天下子孫孝養其親哉具為令



八十以上月賜米肉酒九十以上加賜帛絮長吏閱  
視丞若尉致二千石遣都吏循行不稱者督之

夏四月齊楚地震山崩

二十九山同日崩大水潰出

六月令四方毋來獻

時有獻千里馬者上曰鸞旗在前屬車在後吉行日  
五十里師行三十里朕乘千里馬獨先安之於是還  
其馬與道里費下詔曰朕不受獻也其令四方毋復

來獻

封宋昌為壯武

漢縣故城在今山東萊州府即墨縣西

侯

帝既施惠天下乃修代來功封昌為壯武侯

諸從官張武等

六人官皆九卿

秋八月右丞相勃免

帝益明習國家事問右丞相勃曰天下一歲決獄幾何勃謝不知又問一歲錢穀出入幾何勃又謝不知惶愧汗出浹背帝問左丞相平平曰有主者帝曰謂

陳平所言相佐  
天子云云似矣  
然平非實能如  
此也徒以口給  
免過何足據哉

誰平曰陛下即問決獄責廷尉問錢穀責治粟內史

秦官漢因帝曰然則君所主者何事平謝曰陛下不

知其驚下使待罪宰相宰相者上佐天子理陰陽順

四時下遂萬物之宜外填撫四夷諸侯內親附百姓

使卿大夫各得任其職焉帝曰善勃大慚自知能不

如平乃謝病免平專為丞相

遣大中大夫陸賈使南粵南粵王佗稱臣奉貢

初高后時遣隆慮

漢縣故城在今河南彰德府林縣

侯周竈擊南粵

會暑濕大疫兵不能踰嶺佗因此以兵威財物賂遺

閩越西甌駱

元和志嶺南道邕管貴州本西甌駱越地寨字記永嘉為東甌鬱林為西甌

貴州今廣西潯州府貴縣鬱林故城在縣南

役屬焉東西萬餘里乘黃屋

左纛稱制與中國侔至是帝初鎮撫天下使告諸侯

四夷以陸賈前使粵召為大中大夫謂者一人為副

使賜佗書

書曰朕高皇帝側室之子奉北藩于代高皇帝棄羣臣孝惠皇帝即世高后自臨事

不幸有疾諸呂為變賴功臣之力誅之朕以王侯吏不釋之故不得不立乃者聞王遠隆慮侯書求親昆弟請罷長沙兩將軍朕以王書罷將軍陽侯親昆弟在真定者已遣人存問修治先人家前日聞王發

兵于邊為寇不止長沙苦之南郡尤甚雖王之國庸  
獨利乎必多殺士卒傷良將吏寡人之妻孤人之子  
獨人父母得一亡十朕不忍為也得王之地不足以  
為大得王之財不足以為富嶺以南王自治之雖然  
王號為帝兩帝並立亡一乘之使以通其道是爭也爭  
而不讓仁者不為也願與王分棄前患通使如故

陸賈至佗恐頓首謝罪願奉明詔長為藩臣奉貢職  
下令國中曰兩賢不並世漢皇帝賢天子自今以來

去帝制黃屋左纁因奉書

書稱蠻夷大長老夫臣佗  
昧死再拜上書皇帝陛下

老夫故粵吏也高皇帝幸賜臣佗璽以為南粵王孝  
惠皇帝義不忍絕所賜老夫者甚厚高后用事別異  
蠻夷出令曰毋與粵金鐵田器馬牛羊老夫僻處馬  
牛羊齒已長自以祭祀不修有死罪使凡三輩上書

謝過終不反又風聞父母墳墓已壞削兄弟宗族已誅論吏相與議曰令內不得振于漢外亡以自高異故更號為帝自帝其國非有害于天下也高皇后聞之大怒削南粵之籍使使不通老夫竊疑長沙王讓臣故發兵以伐其邊老夫處粵四十九年今抱孫焉然風興夜寐寢不安席食不甘味者以不得事漢也今陛下幸哀憐復故號通使如故并獻方物老夫死骨不腐改號不敢為帝矣

### 召河南守吳公為廷尉賈誼為大中大夫

帝謂河南守吳公治平為天下第一召為廷尉吳公

薦洛陽人賈誼

誼以能誦詩書屬文稱于郡中吳公召置門下

帝召以為博

士誼時年二十餘帝愛其辭博

每詔令議下諸老先生未能言誼盡為之

漢代稱循吏自吳公始然史臣但云治平為天下第一而未嘗實指其政豈所謂上德不德無蹟之可求耶其薦用賈誼可謂

不蔽賢者已非  
王成黃霸輩所  
能及

對人人各如其意所出  
諸生以為能帝悅之

一歲中超遷至大中大夫誼

請改正朔易服色定官名興禮樂以立漢制更秦法

草具其儀法色上黃數  
用五為官名悉更奏之帝謙讓未遑也

癸亥二年冬十月丞相曲逆侯陳平卒

諡曰獻

平常言吾多陰謀道家所禁吾世即廢亦已矣終不

能復起也

後平曾孫何坐法  
棄市竟不得續封

詔列侯之國

詔曰古者諸侯各守其地以時入貢民不勞苦上下驩欣靡有違德

今列侯居長安邑遠吏卒給輸費苦而列侯亦無由教訓其民其各之國十一月以周勃為丞相

癸卯晦日食詔舉賢良方正能直言極諫者

詔曰人主不德天示之災以戒不治朕下不能治育羣生上以累三光之明不德大矣令至其悉思朕之過失及知見之所不及苟以啟告朕及舉賢良方正能直言極諫者以匡朕之不逮因各敕以職任務省繇費以便民罷衛將軍軍太僕見馬遺財足

遺留也財與纔同減



而留者纔足充數而已

餘皆以給傳置潁陰

漢縣故城在河南陳州府淮寧縣西

北侯騎

侯家之騎從

賈山

潁川人

上書言治亂之道名曰至

言

其辭曰臣聞雷霆之所擊無不摧折者萬鈞之所壓無不糜滅者今人主之威非特雷霆也勢重非

特萬鈞也開道而求諫和顏色而受之用其言而顯其身士猶恐懼而不敢自盡又況于縱欲恣暴惡聞其過乎昔者周蓋千八百國以九州之民養千八百國之君君有餘財民有餘力而頌聲作秦皇帝以千八百國之民自養力罷不能勝其役財盡不能勝其求身死纔數月耳天下四面而攻之宗廟滅絕矣秦皇帝居滅絕之中而不自知者何也亡輔弼之臣亡直諫之士天下已潰而莫之告也今陛下使天下舉賢良方正之士天下之士莫不精白以承休德今已在朝廷矣乃選其賢者使為常侍諸吏與之馳騁射

獵一日再三出臣恐朝廷之解弛百官之墮于事也  
陛下即位親自勉以厚天下振貧民禮高年平獄訟  
刑天下莫不說喜臣聞山東吏布詔令民雖老羸瘡  
疾扶杖而往聽之願少須臾毋死思見德化之成也  
今功業方就名聞方昭四方鄉風詩曰靡不有初鮮  
克有終臣不勝大願願以夏歲二月定明堂造太學  
修先王之道風行俗成萬世之基定惟陛下所幸耳  
古者大臣不得與宴遊方正修潔之士不得從射獵  
使皆務其方以高其節夫士修之于家而壞之于天  
子之廷臣竊愆之陛下與衆臣宴遊與大臣方正朝  
廷議論夫游不失樂朝不失禮議不失計執事之大者也  
帝嘉納焉帝每朝郎從  
官上書疏未嘗不止輦受其言言不可用置之可用  
採之未嘗不稱善

上從霸陵上欲西馳下峻坂中郎  
將袁盎攬轡上曰將軍怯耶盎言

賈誼前議積財  
龍錯繼之以重  
農貴粟其言雖  
難出於管商然  
崇本抑末實為  
足食之原也

### 春正月親耕籍田

曰臣聞千金之子坐不垂堂聖主不乘危不微幸今  
陛下聘六飛下峻山有如馬驚車敗陛下縱自輕奈  
高廟太后何上乃止上所幸慎夫人在禁中常與皇  
后同席坐及幸上林郎署長布席盎引却慎夫人坐  
慎夫人怒上亦怒盎因前說曰臣聞尊卑有序則上  
下和今陛下既已立后慎夫人乃妾妾主豈可與同  
坐且陛下獨不見人彘乎上  
說語慎夫人賜盎金五十觔

賈誼說上曰筦子曰倉廩實而知禮節衣食足而知  
榮辱民不足而治者自古及今未之嘗聞古之人曰  
一夫不耕或受之饑一女不織或受之寒生之有時

而用之無度則物力必屈古之治天下至纖至悉故  
其畜積足恃今背本而趨末者甚衆淫侈之俗日月  
以長生之者甚少而靡之者甚多天下財產何得不  
廢世之有饑饉天之行也禹湯被之矣即不幸有方  
二三千之旱國胡以相恤卒然邊境有急數十百  
萬之衆國胡以餽之夫積貯者天下之大命也苟粟  
多而財有餘何為而不成以攻則取以守則固以戰  
則勝懷敵附遠何招而不至今毆民而歸之農皆著

于本使天下各食其力末技游食之民轉而緣南畝  
則畜積足而人樂其所矣上感誼言于是詔開籍田  
上親率耕以勸百姓

三月立趙幽王子辟疆為河間王

治樂成今直隸河間府獻縣是

朱虛

侯章為城陽王

治莒今山東沂州府莒州是

東牟侯興居為濟北王

治盧故城在今山東濟南府長清縣

子武為代王參為太原王

治晉陽注見前

揖

為梁王

治睢陽今歸德府商邱縣是

有司請立皇子為諸侯王詔先立河間

憐趙王友幽死故既立其

太子遂又復立其少子

城陽濟北

以平諸呂有功故王

三王然後立皇子

三皇子同日立後武侯淮陽參徙代并有太原摯好讀書帝愛之異于他子立十年卒無子武遂徙王梁

夏五月除誹謗妖言法

詔曰古之治天下朝有進善之旌誹謗之木

帝堯事見前

所以通治道而來諫者也今法有誹謗妖言之罪是

使衆臣不敢盡情而上無由聞過失也將何以來遠

方之賢良其除之民或祝詛上以相約而後相謾也

初約祝詛後相欺誑也

吏以為大逆其有他言又以為

中道而止無實事也

詐謗此細民之愚無知抵罪朕甚不取自今以來有  
犯此者勿聽治

秋九月賜天下今年田租之半

詔曰農天下之本也民所恃以生也而民或不務本  
而事末故生不遂朕今親率羣臣農以勸之其賜天  
下民今年田租之半

甲子三年冬十月丁酉晦日食

十一月丁卯晦日食

丞相絳

漢縣後漢改絳邑故城在山西平陽府曲沃縣西南

侯勃免就國

詔曰前遣列侯就國或辭未行丞相朕所重其為朕

率列侯之國

以灌嬰為丞相罷太尉官

淮南王長來朝殺辟陽

漢縣故城在今直隸冀州東南

侯審食其

初高祖過趙趙王敖進美人得幸有身及貫高事發

美人亦坐繫美人母弟趙兼因審食其言吕后吕后

妬弗肯白食其亦不彊爭美人已生子恚即自殺吏



奉其子詣高祖高祖悔名之曰長令呂后母之會黥

布反即封長為淮南王

事具前

王蚤失母附呂后故呂后

時得無恙而常心怨食其弗敢發至是入朝

王素驕塞不奉

法上以親故寬假之及入見從上入苑園獵與上同車常謂上大兄

往見食其袖鐵椎

椎殺之馳至闕下肉袒謝罪帝傷其志為親赦弗治

以此歸國益驕恣出入稱警蹕稱制擬于天子袁盎

諫曰諸侯太驕必生患上不聽

夏五月匈奴入寇帝如甘泉

甘泉宮名也在今陝西西安府涇陽縣西

北遣丞相嬰將兵擊走之遂如太原濟北王興居反遣大將軍柴武擊之秋七月還宮八月興居兵敗自殺

匈奴入居北地河南

注俱見前

為寇上幸甘泉遣丞相灌

嬰發車騎八萬五千擊之匈奴走出塞上因幸太原見故羣臣皆賜之復晉陽中都民三歲租留游十餘日初誅諸呂時朱虛侯章功尤大大臣許盡以趙地王章以梁地王興居帝既立聞其初欲立齊王故絀

其功及王諸子乃割齊二郡王之章興居自以失職

奪功常怏怏

章立歲餘卒

至是上幸太原興居以為天子

且自擊匈奴遂發兵反欲襲滎陽帝聞之詔罷丞相

兵以棘蒲

今直隸趙州

侯柴武為大將軍擊之遂還長安

八月武擊虜興居興居自殺

以張釋之

字季堵陽人

為廷尉

秦官漢因之

釋之初為騎郎十年不得調袁盎薦之為謁者朝畢

因前言事帝曰卑之無甚高論令令可行也釋之乃

言秦漢間得失帝悅拜謁者僕射嘗從行登虎園

在西

安府咸寧縣東北

上問上林尉

漢上林苑有令丞尉屬水衡都尉

諸禽獸簿

尉不能對虎園嗇夫

漢制縣有鄉嗇夫掌聽訟此其類也

從旁代尉對

甚悉上曰吏不當若是耶詔釋之拜嗇夫上林令釋

之曰陛下以周勃張相如

東陽侯

何如人上曰長者釋

之曰此兩人言曾不出口豈效此嗇夫喋喋利口捷

給哉且秦以任刀筆吏爭亟疾苛察相高其敝徒

文具而無實不聞其過陵遲至于土崩今陛下以嗇

夫口辨而超遷之臣恐天下隨風而靡矣上曰善乃

不拜嗇夫以釋之為宮車令

衛尉屬掌司馬門天下上事四方貢獻皆領之

頃之太子與梁王共車入朝不下司馬門釋之追止之劾不敬太后聞之帝免冠謝教兒子不謹太后使使承詔赦太子梁王然後得入帝由是奇釋之拜中

大夫

釋之從行至霸陵時慎夫人從上指示新豐道曰此走邯鄲道也使慎夫人鼓瑟上自倚瑟而

歌意恹悽悲懷顧謂羣臣曰嗟乎以北山石為樽用紆絮斷陳漆其間豈可動哉左右皆曰善釋之曰使其中者有可欲雖銅南山猶有隙使其中無可欲雖無石樽又何戚焉帝稱善至是拜廷尉

釋之謂上使人  
誅之則已豈非  
開人主妄殺之  
端前人已有論  
其失者且法之  
所加惟在當罪  
使罪累當死則  
雖誅之不為過  
否則時輕時重  
皆非所以弼教  
也

上行出中渭橋

玉海架渭者三橋中渭橋在長樂宮  
北西渭橋亦曰便橋在長安西東渭

橋在萬  
年東

有人從橋下走乘輿馬驚捕屬廷尉釋之奏

犯蹕當罰金上怒釋之曰法者天子所與天下公共  
也今法如是更重之是法不信于民也且方其時上  
使使誅之則已今已下廷尉廷尉天下之平也壹傾  
天下用法皆為之輕重民安所措其手足上良久曰  
廷尉當是也後有人盜高廟坐前玉環得下廷尉治  
釋之奏當棄市上大怒曰人盜先帝器吾欲置之族

而君以法奏之非吾所以共讀曰恭承宗廟意也釋之

曰法如是足也今盜宗廟器而族之有如萬分之一  
愚民取長陵一抔土陛下何以加其法乎帝乃白太  
后許之

乙丑四年冬十二月丞相潁陰侯灌嬰卒諡曰懿以張蒼陽武

人為丞相

蒼自秦時為柱下史明習天下圖書計籍尤善律歷

高祖用為計相專主計籍至是以御史大夫代灌嬰為丞

相歷有黃帝顓頊夏殷周及魯六家蒼用顓頊歷于六家疏閭中最高祖十月始至霸上因故秦時本以十月為歲首而朔晦月見弦望滿虧多非是

名河東

漢河東郡治安邑安邑注見前

守季布至罷歸郡

上召季布欲以為御史大夫或言其使酒難近至留邸一月見罷布因進曰臣無功竊寵待罪河東陛下無故召臣此人必有以臣欺陛下者今臣至無所受事罷去此人必有毀臣者夫以一人之譽而召臣以一人之毀而去臣恐天下有識聞之有以闕陛下之



淺深也上默然良久曰河東吾股肱郡故特召君耳  
下絳侯周勃廷尉獄既而赦之

勃既就國每河東守尉行縣至絳勃自畏常被甲令  
家人持兵以見之人有告勃欲反下廷尉逮治勃恐  
不知置辭

謂對獄  
之語

吏稍侵辱之勃以千金與吏吏乃

書牘背示之曰以公主為證公主者帝女也勃子勝  
之尚之故獄吏教引為證太后謂帝曰絳侯始誅諸  
呂綰皇帝璽居北軍不以此時反今居一小縣顧欲

反耶帝亦見勃獄辭乃使使持節赦之復爵邑勃既出曰吾嘗將百萬軍然安知獄吏之貴乎

作顧成廟

在西安府咸寧縣東應助曰帝自為廟制度早狹若顧望而成故名自後諸帝皆自立廟

景帝廟號德陽武帝廟號龍淵昭帝廟號排徊宣帝廟號樂游元帝廟號長壽成帝廟號陽池

丙寅五年春二月地震

夏四月更造四銖錢除盜鑄令

初秦用半兩錢

文曰半兩重如其文

高祖嫌其重更鑄英錢

杜佑

曰錢如榆莢重一銖半徑五分

于是物價騰踊米石萬錢至是更造

姦民趨利雖日  
禁盜猶恐不  
免又可聽其放  
鑄耶二賈所言  
俱切中情弊而  
誼為尤詳

四銖錢

文亦曰半兩稍輕

除盜鑄錢令使民放鑄賈誼諫曰

法使天下公得鑄錢敢雜以鉛鐵者罪黥然鑄錢非殺  
雜為巧則不可得贏而殺之甚微為利甚厚夫事有  
名禍而法有起姦今令細民人操造幣之勢各隱屏  
而鑄作因欲禁其厚利微姦雖黥罪日報其勢不止  
曩禁鑄錢死罪積下今公鑄錢黥罪積下姦數不勝  
法禁數潰銅使之然也銅布于天下其為禍博矣故  
不如收之

賈山亦上書言錢者亡用器也而可以易富貴富貴者人主之操柄也令民為之是

與人主共操柄不可長也 上不聽當是時吳王濞以諸侯即豫章

銅山

韋昭曰豫章當作故鄣今浙江湖州府安吉州漢故鄣縣其東有銅峴山括地志吳採鄣山之

此銅即

鑄錢富埒天子大中大夫鄧通

蜀郡南安人

以寵幸

賜蜀嚴道銅山

今四川雅州府榮經縣漢嚴道其北有銅山

使鑄錢財過

王者以故吳鄧錢滿天下

丁卯六年冬十月淮南王長謀反廢徙蜀道卒

淮南王長自作法令逐漢所置吏請自置相帝曲意從之又擅刑殺不辜及爵人至關內侯數上書不遜

帝重自切責之復令薄昭與書引管蔡以為警戒長

不悅至是謀反

令男子但等與柴武子奇謀以事覺  
輦車反谷口令人使聞越匈奴

召至長安丞相御史大夫等奏長罪當棄市上不忍

置法赦長死徙處蜀載以輜車縣次傳之袁盎諫曰

上素驕淮南王弗為置嚴傳相以故至此今暴摧折

之臣恐卒霧露病死陛下有殺弟之名奈何上曰吾

特苦之耳令復之王果恚憤不食死傳者不敢發車

封至雍

漢縣故城在今陝西  
鳳翔府鳳翔縣南

雍令發之以死聞上哭

甚悲逮考諸縣不發封餽侍者皆棄市葬長以列侯  
禮民或歌之曰一尺布尚可縫一斗粟尚可舂兄弟  
二人不相容上聞而病之後二年封長子安等四人

皆為列侯

安為阜陵侯勃為安陽侯  
賜為陽周侯良為東城侯

賈誼知上必將

復王之也諫曰淮南王悖逆無道天下孰不知其舉  
今奉尊罪人之子適足以負謗于天下爾此人少壯

豈能忘其父哉弗聽

十二年追謚  
長曰厲王

匈奴復請和親

論賈誼者或責  
備漢文或歸罪

初冒頓遺漢書請復故約帝報書并遺之繡袷綺衣

諸物至是冒頓死子稽粥立號曰老上單于帝遣宗

室女翁主為單于閼氏使宦者中行說

晉中行傳翁氏之別

主說不欲行彊使之說曰必我也為漢患者既至降

單于甚親幸于是說教單于左右疏記

謂分條而記之以計

課其人衆畜物遺漢書牘及印封皆令長大倨傲其

辭曰天地所生日月所置匈奴大單于

以賈誼為梁王太傅

絳灌或咎誼不能自用獨班固以為誼以早終雖不至公卿未為不遇斯言最當蓋誼才畧頗優然以耳少銳于進取能動而不能靜以吳公初薦用而即請改朔易服觀之使竟得相用其不至制作紛更如宋之王安石者亦幾希耳

初上議以誼任公卿之位大臣多短之曰年少初學

專欲擅權紛亂諸事上于是疏之以為長沙王太傅

誼以適去意不自得渡湘為賦以弔屈原至長沙久地卑濕有服鳥飛入其舍誼自傷悼為賦以自廣

之上思誼徵之至入見上方受釐音禱顏師古曰福也受釐祭畢而受

神之福也坐宣室未央前正室因問鬼神之本誼具道所以然之

故至夜半帝前席既罷曰吾久不見賈生自以為過

之今不及也乃拜誼梁王太傅誼上疏曰臣竊惟令

之事勢可為痛哭者一可為流涕者二可為長太息



者六若其他背理而傷道者難徧以疏舉進言者皆曰天下已安已治矣臣以為非愚則諛皆非知治亂之體者也陛下何不壹令臣得孰數之于前因陳治

安之策試詳擇焉

其畧曰夫樹國固必相疑之勢下數被其殃上數喪其憂甚非所以

安上而全下也今或親弟謀為東帝親兄之子西向而擊今吳又見告矣天子春秋鼎盛行義未過德澤有如焉猶尚如是況莫大諸侯權力且十此者乎曩時高皇帝剖膏腴之地以王諸侯德至渥也然其後十年之間反者九起臣竊跡前事大抵彊者先反弱者後反長沙乃二萬五千戶耳功少而最完勢疏而最忠非獨性異人也亦形勢然也曩令樊鄴絳灌據數十城而王今雖已殘亡可也今信越之倫列為微

便雖至今存可也然則天下之大計可知已欲諸王之  
皆忠附莫若令如長沙王欲臣子之勿蒞醢亦莫若  
令如典鄴等欲天下之治安莫若衆建諸侯而少其  
力力少則易使以義國小則無邪心今海內之勢如  
身之使臂臂之使指莫不制從割地定制各為若干  
國使其子孫以次受之分地衆而子孫少者建以為國  
空而置之煩其子孫生者舉使君之一寸之地一人  
之衆天子亡所利焉誠以定治而已天下之勢方病  
大瘡一脛之大幾如要一指之大幾如股平居不可  
屈信失今不治必為痼疾可痛哭者此病是也天下  
之勢方倒懸今匈奴嫚侮掠至不敬也為天下患  
至亡已也而漢歲致金絮采繒以奉之夷狄徵令是  
主上之操也天子共貢是臣下之禮也倒懸如此莫  
之能解猶為國有人乎可為流涕者此也陛下何忍  
以帝王之號為戎人諸侯勢既卑辱而禍不息長此  
安窮臣竊料匈奴之衆不過漢一大縣以天下之大

因于一縣之衆甚為執事者羞之陛下何不試以臣  
為屬國之官主匈奴行臣之計請必繫單于之頸而  
制其命伏中行說而笞其背舉匈奴之衆惟上之令  
今不獵猛敵而獵田鼠不搏反寇而搏畜兔玩細娛  
而不圖大患可為流涕者此也今民賣僮者為之繡  
衣緣履偏諸緣是古天子后服也而庶民得以衣婢  
妾白縠之表薄紈之裏縫以偏諸美者敵繡是古天  
子之服而富人大賈召客者以被牆且帝之身自衣  
皂繡而富民墻屋被文繡天子之后以緣其領者庶  
人嬖妾緣其履此臣所謂舛也夫俗至大不敬也至  
亡等也至冒上也進計者猶曰毋為可為長太息者  
此也商君遺禮義棄仁恩并心于進取行之二歲秦  
俗日敗政素人家富子壯則出分家貧子壯則出贅  
偕父援勸慮有德色母取箕帚立而辭語抱哺其子  
與公併倨鄰姑不相得則反脣而相撻其不同禽獸  
者無幾耳今其遺風餘俗猶尚未改棄禮義捐廉恥

日甚月異而歲不相同矣而大臣特以簿書期會之間以為大故至于流俗失世壞敗因恬而不知怪以為是適然耳夫移風易俗使天下回心而鄉道類非俗吏之所能為也俗吏之所務在于刀筆筐篋而不如大體管子曰禮義廉恥是為四維四維不張國乃滅亡可不為寒心哉豈如今定經制令君君臣臣上下有差父子六親各得其宜此業一定世世常安若夫經制不定是猶渡江河亡維楫中流而遇風波船必覆矣可為長太息者此也夏殷周為天子皆數十世秦為天子二世而亡何三代有道之長而秦無道之暴也古之王者太子乃生有司齊肅端冕見之南郊過闕則下過廟則趨故自為赤子而教固已行矣孩提有識三公三少明孝仁禮義以道習之逐去邪人不使見惡行選天下之端士有道術者使與居處出入故太子乃生而見正事聞正言行正道左右前後皆正人也孔子曰少成若天性習慣如自然三代

之所以長久者以其輔翼太子有此具也及秦而不  
然使趙高傳胡亥而教之獄所習者非斬刺人則夷  
人之三族也故胡亥今日即位而明日射人忠諫者  
謂之誅謗深計者謂之妖言其視殺人若艾草管然  
豈惟胡亥之性惡哉彼其所以道之者非其理故也  
鄙諺曰前車覆後車鑒天下之命懸于太子太子之  
善在于早諭教與選左右教得而左右正則太子正  
矣太子正而天下定矣此時務也凡人之智能見已  
然不能見將然夫禮者禁于將然之前而法者禁于  
已然之後是故法之所為用易見而禮之所為至難  
知也若夫慶賞以勸善刑罰以懲惡先生執此之政  
堅如金石行此之令信如四時據此之公無私如天  
地豈顧不用哉然而禮云禮云者責絕惡于未萌起  
教于微渺使民日遷善遠邇而不自知也世主之欲  
民善同而所以使民善者異或道之以德教或威之  
以法令道之以德教者德教洽而民氣樂威之以法令

者法令極而民風哀哀樂之感禍福之應也夫人之  
置器置諸安處則安置諸危處則危天下大器也在  
天子之所置之湯武置天下于仁義禮樂累子孫數  
十世此天下所共聞也秦皇置天下于法令刑罰禍  
幾及身子孫謀絕此天下所共見也今或言禮義之  
不如法令教化之不如刑罰蓋引殷周秦事以觀之  
也人主之尊譬如堂羣臣如陛衆庶如地故陛九級  
上廉遠地則堂高陛無級廉近地則堂卑高者難攀  
卑者易陵理勢然也故古者聖王制為等列內有公  
卿大夫士外有公侯伯子男然後有官司小吏延及  
庶人等級分明而天子加焉故其尊不可及也諺曰  
欲投鼠而忌器鼠近于器尚憚不投恐傷其器況于  
貴臣之近主乎廉恥節禮以治君子是以黜削之罪  
不及大夫以其離主上不遠也今自王侯三公之貴  
皆天子之所改容而禮之者也古天子之所謂伯父  
伯舅也而今與衆庶同黜削髡刑棄市之刑然則堂

不亡陞乎被戮者不泰迫乎廉恥不行大臣無乃握  
重權大官而有徒隸無恥之心乎夫嘗已在貴寵之  
位今而有過帝令廢之可也退之可也賜之死可也  
滅之可也若夫束縛之係縲之輸之司寇編之徒官  
司寇小吏詈罵而榜笞之非尊尊貴貴之化也古者  
大臣有坐不廉而廢者曰箠蓋不飾坐汙穢淫亂者  
曰惟節不修坐罷軟不勝任者曰下官不職故貴大  
臣定有罪矣猶未斥然正以呼之也尚遷就而為之諱  
也遇之有禮故羣臣自憲嬰以廉恥故人矜節行化  
成俗定則為人臣者皆願行而忘利守節而仗義故  
可以託不御之權可以寄六尺之孤此勵廉恥行禮  
誼之所致也主上何喪焉此之不為而顧彼之久行  
故曰可為長上深納其言後梁王揖墜馬死捐無子  
誼請為

梁立後而以淮南地益淮陽  
帝于是徙淮陽王武為梁王  
誼自傷為傳無狀常哭

泣歲餘亦卒時年三十三

己巳八年夏長星出東方

庚午九年春大旱

辛未十年冬車騎將軍薄昭有罪自殺

昭殺漢使者帝不忍加誅使公卿從之飲酒欲令自

引分昭不肯使羣臣喪服往哭之乃自殺

昭初封軹侯既死帝

為置後

壬申十一年匈奴寇狄道

漢縣今為州屬甘肅蘭州府



時匈奴數為邊患太子家令

秦官漢因之屬詹事

鼂錯

鼂與朝同王子

朝之後以名為氏錯潁川人

上書言兵事曰臣聞用兵臨陣合刃

之急者三一曰得地形二曰卒服習三曰器用利步

兵之地

山林川阜

車騎二不當一車騎之地

平原曠野

步兵十

不當一弓弩之地

平陵相遠川谷居間仰高臨下

短兵百不當一長

戟之地

兩陣相近可前可後

劒楯三不當一矛鋌之地

荏葦竹蕭草木

接長戟二不當一劒楯之地

曲道相伏險阨相薄

弓弩三不當

一士不選練卒不服習前擊後懈與金鼓之音相失

此不習勒卒之過也百不當十兵不完利甲不堅密  
弩不及遠射不能中中不能入此將不省兵之禍也  
五不當一故曰器械不利以其卒予敵也卒不可用  
以其將與敵也將不知兵以其主與敵也君不擇將  
以其國與敵也四者兵之至要也今匈奴地形技藝  
與中國異上下山坂出入溪澗中國之馬弗與猶弗如  
也險道傾仄且馳且射中國之騎弗與也風雨罷勞  
饑渴不困中國之人弗與也此匈奴之長技也若夫

平原易地輕車突騎則匈奴之衆易撓亂也勁弩長

戟射疏及遠則匈奴之弓弗能格也堅甲利刃長短

相雜遊弩往來則匈奴之兵弗能當也材官騶發

材官

有材力者騶發言驟發其矢也

矢道同的

言用矢者同中一的

則匈奴之革筈

以皮作如鎗

木薦

以木作如櫓

弗能支也下馬地鬪劒戟相接

去就相薄則匈奴之足弗能給也此中國之長技也

匈奴之長技三中國之長技五陛下又與數十萬之

衆以誅數萬之匈奴衆寡之計以一擊十之術也雖

然兵凶器戰危事帝王之道出于萬全今降胡義渠

註見前

來歸誼者其衆數千長技與匈奴同可賜之堅

甲絮衣勁弓利矢益以邊郡之良騎令明將能知其  
習俗和輯其心者將之即有險阻以此當之平地通  
道則以輕車材官制之兩軍相為表裏各用其長技  
此萬全之術也帝嘉之賜書寵答焉

錯初學申商法  
為人峭直刻深

以其辯侍幸太  
子號曰智囊

募民徙塞下

量錯復上言臣聞兵起而不知其勢戰則為人禽屯  
則卒積死今匈奴數轉牧行獵于塞下以候備塞之  
卒卒少則入不救則邊民絕望而降敵救之纔到則  
胡又已去聚而不罷為費甚大罷之則胡復入如此  
連年則中國貧苦而民不安矣陛下幸憂邊境發卒  
治塞然令遠方之卒守塞一歲而更不如選常居者  
家室田作且以備之以便為之高城深塹要害之處  
調立城邑毋下千家先為室屋具田器乃募民免罪

拜爵復其家予冬夏衣廩食能自給而止

初徙予之能自供贍

即止塞下之民利祿不厚不可使久居危難之地胡人

入驅而能止其所驅者以其半與之縣官為贖如是

則邑里相救助赴敵不避死非以德上也欲全親戚

而利其財也此與東方之戍卒不習地勢而畏胡者

功相萬也上從之

錯復言陛下幸募民以實塞下使屯戍益省輸將益寡甚大惠也臣

聞古之徙民者相其陰陽之和嘗其水泉之味然後營邑立城制里割宅置器物馬使民至有所居作有所用此民所以輕去其鄉而勸之新邑也為置醫巫以救疾病修祭祀男女有昏生死相恤墳墓相從種

樹畜長所以使民樂其處而有長居之心也臣又聞古之制邊縣以備敵也使伍家為伍十伍為里四里一連十連為邑皆擇其邑之賢才習地形知民心者為之長居則習民于射法出則教民于應敵服習以成勿全遣徙幼則同遊長則共事夜戰聲相知則足以相救晝戰目相見則足以相識雖愛之心足以相死如此而勸以厚賞威以重罰則前死而不旋踵矣

癸酉十二年冬十二月河決酸棗

漢縣故城在河南衛輝府滑縣北

東潰金堤

括地志金堤一名千里堤在白馬東白馬漢縣故城在衛輝府滑縣東北

于是

東郡大興卒塞之

劉友益曰書河決始此

詔民入粟邊拜爵免罪賜民今年半租

鼂錯上言請重農貴粟

畧曰聖王在上而民不凍餓者非能耕而食之織而衣之

也為開其資財之道也故堯有九年之水湯有七年之旱而國亡捐瘠者以畜積多而備先具也今海內為一亡有水旱之災而畜積未及者何也地有餘利民有餘力生穀之土未盡墾山澤之利未盡出游食之民未盡歸農也人情一日不再食則餓終歲不製衣則寒腹饑不得食膚寒不得衣雖慈母不能保其子君安能以有其民哉夫珠玉金銀饑不可食寒不可衣然而衆貴之者以上用之故也粟米布帛一日弗得而饑寒至是故明君貴五穀而賤珠玉今農夫五口之家耕不過百畝收不過百石春耕夏耘秋獲冬歲四時之間亡日休息又私自送往迎來弔死問疾養孤長幼在其中勤苦如此復被水旱之災賦歛不時朝令暮改有者半價而賣無者取倍稱之息于是有賣田宅鬻子孫以償債者矣而商賈大者積貯倍



息小者坐列販賣操其奇贏日游都市乘上之急所  
賣必倍故其男不耕耘女不蠶織衣必文采食必粱  
肉因其富厚交通王侯千里游敖冠蓋相望此商人  
所以兼并農人所以流亡者也方今之務莫若使民  
務農欲民務農在于貴粟貴粟之道在于使民以粟  
為賞罰令募天下入粟縣官得以拜爵除罪則富人  
有爵農民有錢所謂捐有餘補不足令出  
而民利者也不過三歲塞下之粟必多矣帝從之令  
民入粟于邊拜爵以多少級數為差錯復言邊食足支  
五歲可入粟郡縣郡縣足支一歲可時赦勿收農民租  
帝復從之乃下詔曰道民之路在于務本朕親率天下  
農十年于今而野不加闢歲一不登民有饑色是從事

馬尚寡而吏奉吾詔不勤而勸民不明也且吾農民甚苦而吏莫之省將何以勸焉其賜農民今年田租之半

置三老孝悌力田常員

詔曰孝悌天下之大順也力田為生之本也三老衆民之師也廉吏民之表也朕甚嘉此二三大夫之行

令萬家之縣云無應令

謂無孝悌力田可應察舉之令

豈實人情是

吏舉賢之道未備也其遣謁者勞賜

三老孝者帛五匹悌者力田二

匹廉吏三匹

及問民所不便安而以戶口率置三老孝悌

力田常員令各率其意以道民焉

戊甲十三年春二月詔具親耕桑禮儀

詔曰朕親耕以供粢盛皇后親桑以奉祭祀其具禮

儀

漢書儀春始東耕于籍田以太牢祀先農百官皆從以次耕又春桑生皇后親桑于苑中養蠶于薄

以少牢祀蠶神還獻于前館

夏除秘祝

初秦時祝官有秘祝即有災祥輒移過于下至是詔曰禍自怨起福由德興百官之非宜由朕躬今秘祝

之官移禍于下朕甚不取其除之

五月除肉刑

齊太倉令淳于意

臨淄人師同郡公乘陽慶受黃帝扁鵲脈書診病知生死

有罪

當刑詔逮繫長安其少女緹紫

意有五女臨行意罵曰生子不生男緩急

無可使緹紫傷父言乃隨之西

上書曰妾父為吏齊中皆稱其廉平

今坐法當刑妾傷夫死者不可復生斷者不可復續雖欲改過自新其道無繇願沒入為官婢以贖父刑罪帝憐悲其意詔曰詩曰愷弟君子民之父母令人

有過教未施而刑已加焉或欲改過為善而道無繇  
至朕甚憐之夫刑至斷支體刻肌膚終身不息何其  
痛而不德也豈為民父母之意哉其餘肉刑有以易之

於是丞相張蒼等定律以上

當髡者為城旦春當黥者  
者鉗為城旦春當劓者

笞三百當斬左止者笞五百當斬右止及殺人先自  
告吏坐受賕枉法守縣官財物而即盜之已論而復  
有笞罪者皆棄市其城  
旦春者各有歲數以免制曰可是時上既躬修元默

而將相皆舊功臣懲惡亡秦之政論議務在寬厚化  
行天下吏安其官民樂其業畜積歲增戶寢息也生風

流篤厚禁網疏闊是以刑罰大省斷獄四百有刑措之風焉

六月除田之租稅

詔曰農天下之本務莫大焉今厘

與勤同

身從事而有

租稅之賦是謂本末者

本謂農末謂商賈

無以異也其于勸

農之道未備除之

永十四年冬匈奴入寇遣兵擊之出塞而還

匈奴老上單于以十四萬騎入朝那

漢縣故城在今甘肅平涼府平

除田租稅或因  
水旱或去其已  
甚若永除之則  
國家經費將何  
取給文帝雖仁  
不能為此必史  
有關文耳

涼縣  
西北

蕭關

在平涼府固  
原州東南

殺北地都尉卿

印姓孫見  
功臣表

虜

人畜甚多使奇兵入燒回中宮

注見前

候騎至雍甘泉

注見前

詔發車千乘騎卒十萬上親勞軍勒兵申教令

欲自征匈奴羣臣諫不聽皇太后固要上乃止以張  
相如欒布為將軍擊逐出塞即還

赦作徒魏尚

槐里人

復為雲中守

漢雲中郡治雲中縣  
即趙故城注見前

上輦過郎署見郎署長馮唐問曰父老

顏師古曰謂  
年已老也考

唐在武帝初年九十餘則此時  
年當餘六十故帝呼之曰父老何自為郎家安在對

曰臣大父趙人父徙代上曰吾居代時吾尚食監高祛數為我言趙將李齊之賢戰于鉅鹿下令吾每飯意未嘗不在鉅鹿也父老知之乎對曰尚不如廉頗李牧之為將也上搏髀曰嗟乎吾獨不得廉頗李牧為將吾豈憂匈奴哉唐曰陛下雖得之不能用也上怒復入禁中良久召唐卒復問曰公何以知吾不能用廉頗李牧也唐對曰上古王者之遣將也跪而推轂曰閫以外寡人制之閫以外將軍制之軍功爵賞



皆決于外歸而奏之要非虛言也李牧為趙將軍市  
租皆自用饗士賞賜不從中覆委任而責成功故牧  
得盡其智能而趙幾霸今臣竊聞魏尚為雲中守其  
軍市租盡以饗士卒私養錢私廩假錢自饗賓客軍吏舍  
人是以匈奴遠避不敢近塞虜曾一入尚擊之所殺甚

衆坐上功首虜差六級

秦法斬敵一首拜爵一級今魏尚所上首虜之數差六級

因坐罪

陛下下之吏削其爵徒作之由此言之陛下賞

太輕罰太重雖得頗牧弗能用也上悅是日令馮唐

持節赦魏尚復為雲中守拜唐為車騎都尉

春增諸祀壇場珪幣

詔曰朕獲執犧牲珪幣以事上帝宗廟十四年于今  
歷日彌長朕甚自愧其廣增諸祀壇場珪幣昔先王  
遠施不求其報望祀不祈其福右賢左戚先民後已  
至明之極也今吾聞祠官祝釐皆歸福于朕躬不為  
百姓夫以朕之不德而專饗獨美其福百姓不與焉  
是重吾不德也其令祠官致敬無有所祈

明于天地之性  
者不可惑以神  
怪賈誼初請改  
正易服且譴議  
未遑何以於黃  
龍之見即譴雍  
祀彼斯壇平等  
之怪誕非有以  
乘其間乎文帝  
三代下令主于  
此不無遺憾

丙子十五年春黃龍見成紀注見前夏四月帝如雍始郊見

五帝此五時之五帝也五時注詳後景帝中六年

初魯人公孫臣上言始秦得水德漢受之當為土德

應黃龍見宜改正朔色尚黃丞相張蒼以漢乃水德

公孫臣言非是罷之至是黃龍見成紀帝召公孫臣

為博士與諸生申明土德草改厯服色事張蒼由下是逆繼

詔禮官議郊祀夏四月帝行幸雍郊見五帝

秋九月親策賢良能直言極諫者以鼂錯為中大夫

詔諸侯王公卿郡守舉賢良能直言極諫者上親策

之時對策者百餘人太子家令鼂錯最為高第

錯對策大

畧以為五帝其臣莫及則自親之三王臣主俱賢則共憂之五伯不及其臣則任使之故各當其世而立

功德擢為中大夫錯又上言宜削諸侯及法令可更

定者書凡三十篇上雖不盡聽然奇其材

丑丁十六年夏四月郊祀五帝于渭陽以新垣平為上大夫

趙人新垣平以望氣見上曰長安東北有神氣成五

采東北神明之舍天瑞下宜立祠以合符應于是作

渭陽五帝廟

廟同一字帝各一殿面五門各如其夏方之色括地志廟在咸陽東臨渭

四月帝親祠之貴平至上大夫賜累千金而使博士

諸生刺

采取之也

六經中作王制

即今禮記王制篇

議巡守封禪

事

分齊地立悼惠王子六人為王

齊王則

哀王襄子

薨無子國除上乃分齊地立悼惠王肥

子將閭為齊王志為濟北

注見前

王賢為菑川

治劇故城在今

山東青州府壽光縣

王雄渠為膠東

治即墨注見前

王卬為膠西

治高密今

縣屬萊州府

王辟光為濟南

治東平陵今濟南府歷城縣是

王

分淮南地立厲王子三人為王

安為淮南王

仍治壽春

勃為衡山王

治六安見前

賜為廬江

治舒

今江南廬州府廬江縣是

王

厲王四子東城侯良已卒故不封

詔更以明年為元年立汾陰

注見前

廟

玉杯尚可假刻日卻何以復中

新垣平之荒誕與文成五利無

異文帝早覺而誅之庶幾不悞

改過耳

新垣平使人持玉杯詣闕下而入言于上曰闕下有寶玉氣已視之果有獻玉杯者刻曰人主延壽平又言臣候日再中居頃之日卻復中于是始更以十七

年為元年令天下大酺平復言周鼎在泗水中

注見前

今河決通于泗而汾陰有金寶氣意鼎出乎于是治廟汾陰欲祠鼎出

戊寅後元年冬十月新垣平伏誅

人有上書告新垣平所言皆詐也下吏治誅夷平是

後上亦怠于改正

之成反服也服色

鬼神之事渭陽五

帝使祠官領以時致禮不往焉

詔議可以佐百姓者

詔曰間者數年不登又有水旱疾疫之災朕甚憂之  
意者朕之政有所失而行有過與將百官之奉養或  
費無用之事或多與何其民食之寡乏也夫度田非  
益寡而計民未加益以口量地其于古猶有餘而食  
之甚不足者其咎安在無乃百姓之從事于末以害  
農者蕃為酒醪以靡同康散也穀者多六畜之食焉者衆  
與細大之義吾未能得其中其與丞相列侯吏二千  
石博士議之有可以佐百姓者率意遠思無有所隱



知已二年夏復與匈奴和親

詔曰間者累年匈奴並暴邊境多殺吏民朕夙興夜寐為之惻怛不安未嘗一日忘于心故遣使者冠蓋

相望結轍

使車往還故轍如結

于道以諭朕志于單于今單于

計社稷之安便萬民之利新與朕俱棄細過偕之大道結兄弟之義以全天下元元之命和親以定始于

今年

時上遣匈奴書匈奴亦使當戶報謝復和親當戶匈奴官名

秋八月丞相蒼免以申屠嘉

申侯之後居安定屠原為申屠氏嘉梁人

為丞相

時張蒼病免

蒼罷相口中無齒食乳年百餘歲乃卒

帝以后弟廣國賢

有行欲相之曰恐天下以吾私廣國久念不可而高

帝時大臣餘見無可者御史大夫申屠嘉故以材官

蹶張

如淳曰有材多力之士能脚蹋强弩張之故曰蹶張

從高帝封關內侯遂

以為丞相嘉為人彊直門不受私謁是時大中大夫

鄧通方愛幸

通初以權船為黃頭郎帝嘗夢欲登天不能有黃頭郎推之上顧其衣尻帶穿

覺而之漸臺見通其衣後穿夢中所見也嘉嘗入朝

通居上旁怠慢嘉奏事畢因言曰陛下愛幸羣臣即

富貴之至于朝廷之禮不可不肅上曰君勿言吾私

之

顏師古曰言當私戒之

罷朝嘉坐府中為檄召通不來且斬

通恐入言上上曰汝第往吾使人召若通詣丞相免

冠徒跣頓首謝嘉坐自如責曰朝廷者高帝之朝廷

也通小臣戲殿上大不敬當斬史

令史也

今行斬之通

頓首首盡出血不解上度丞相已困通使使持節召

通而謝丞相曰此吾弄臣君釋之通至為上泣曰丞

相幾殺臣

辛巳四年夏四月丙寅晦日食

癸未六年冬匈奴寇上郡雲中詔將軍周亞夫

勅次子等封條侯

屯兵備之

匈奴老上單于死子軍臣單于立絕漢和親大入上

郡

漢郡治膚施膚施縣今屬延安府

雲中所殺畧甚衆烽火通于甘

泉長安遣將軍令免

顏師古曰姓令名免

屯飛狐蘇意屯句注

飛狐句注注俱見前

張武屯北地

漢郡治馬領故城在今甘肅慶陽府環縣東南

周亞

夫次細柳

今西安府咸陽縣西南有細柳倉即亞夫屯兵處

劉禮次霸上徐

厲次棘門

在咸陽縣東北秦故關門也

以備胡上自勞軍至霸上

及棘門軍直馳入將以下騎送迎已而至細柳軍軍士吏被甲銳兵刃彀弓弩持滿先驅至不得入曰天子且至軍門都尉曰將軍令曰軍中聞將軍令不聞天子之詔于是上乃使使持節詔將軍吾欲勞軍亞夫乃傳言開壁門門士請車騎曰將軍約軍中不得馳驅于是上乃按轡徐行至營亞夫持兵揖曰介冑之士不拜請以軍禮見上為改容式車使人稱謝皇

帝敬勞將軍成禮而去羣臣皆驚上曰嗟乎此真將軍也曩者霸上棘門軍若兒戲耳其將固可襲而虜也至于亞夫可得而犯哉稱善者久之後月餘匈奴遠塞兵罷拜亞夫為中尉

秦官漢因之掌徵循京師

夏大旱蝗詔弛利省費振民

令諸侯毋入貢弛山澤減諸服御損郎吏員發倉庾

在邑曰倉在野曰庾

以振貧民民得賣爵

富人欲爵貧人欲錢故聽賣買

甲申七年夏六月帝崩遺詔短喪

遺詔曰萬物之生靡不有死死者天地之理物之自然奚可甚哀當今之世咸嘉生而惡死厚葬以破業重服以傷生吾甚不取且朕既不德無以佐百姓令崩又使重服久臨哀人父子損其飲食絕鬼神之祭祀以重吾不德謂天下何朕獲保宗廟以眇眇之身託于天下君王之上二十有餘年賴天之靈社稷之福方內安寧靡有兵革朕既不敏常畏過行以羞先帝之遺德惟年之久長懼于不終今乃幸以天年得

復供養于高廟其奚哀念之有其令天下吏民令到

出臨三日皆釋服殿中當臨者皆以旦夕各十五舉

音禮畢罷服大紅

與功同

十五日小紅十四日纖七日

釋服

大功小功纖皆以衰布言由粗及細大功中祥小功大祥纖則禫也三十六日而釋服以日易

也月布告天下使明知朕意霸陵山川因其故無有所

改

因山為藏不復起墳就其水名以為陵號

歸夫人以下至少使

夫人下有美人

良人八子七子長使少使皆遣歸家

葬霸陵

在西安府咸寧縣東其西北為霸陵縣即霸上也



文帝仁儉之德  
當觀其大者述  
者自史臣傳採  
傳會稽范真  
無論持黃金以  
營臺分千金以  
號中人之產為  
理所必無即慎  
夫人衣不曳地  
而鄧通則給銅  
山鑄錢事卑有  
刺諫者此者甚  
至以賜吳王几  
杖為止叛賜張  
武金為止貪不  
幾執求襄徐休

帝在位二十三年宮室苑囿車騎服御無所增益有

不便輒弛以利民嘗欲作露臺

史記索隱新豐驪山上有露臺鄉即文帝

欲作臺處名匠計之直百金帝曰百金中人十家之產也

吾奉先帝宮室常恐羞之何以臺為身衣弋綈

弋黑色綈

厚繒也所幸慎夫人衣不曳地帷帳無文繡以示敦朴

為天下先治霸陵皆瓦器不得以金銀銅錫為飾吳

王詐病不朝賜以几杖羣臣袁盎等諫說雖切嘗假

借納用之張武等受賂遺金錢覺賜御府錢以愧其

王愚懦之見窺  
尋今辟職向固  
讀史屢及之蓋  
以辭害意古今  
通病不可不知

心專務以德化民是以海內安寧家給人足後世鮮  
能及之

太子啟即位

是為孝  
景帝

尊皇太后曰太皇太后皇后曰皇太后

秋九月有星孛于西方

孝景皇帝

乙酉元年冬十月尊高皇帝為太祖孝文皇帝為太宗令

郡國立太宗廟

丞相嘉等奏功莫大于高皇帝德莫盛于孝文皇帝  
高皇帝宜為太祖之廟孝文皇帝宜為太宗之廟天  
子世世獻郡國宜各立太宗廟制曰可

復收民田半租

初文帝除民田租

事具前

至是令民出租之半三十而

稅一也

減笞法

文帝雖除肉刑而笞五百及三百者率多死至是帝

下詔曰加笞與重罪

謂死刑

無異幸而不死不可為人

其定律笞五百曰三百笞三百曰二百然尚有不全

者後更減笞三百曰二百笞二百曰一百

事在中元六年又

定箠令

箠以竹為之長五尺其本大一寸末薄半寸皆平其節

當笞者笞臀毋

得更人

謂行笞者不更易人

自是笞者得全

以張歐

沛人字叔高祖功臣安邱侯說少子

為廷尉

歐事帝于太子宮雖治刑名家為人長者未嘗言案

人專以誠長者處官官屬亦不敢大欺

丙戌二年冬十二月有星孛于西南

春三月立子六人為王

德為河間王

故河間哀王福薨無子以其地封德

闕為臨江

治江陵注見前

王

立三年薨無子

餘為淮陽

注見前

王

後徙封魯

非為汝南

治平輿注見前

王

後徙封江都

彭祖為廣川

治信都注見前

王

後徙封趙

發為長沙

注見前

王長沙王吳著薨無子國除故以其地封發

夏四月太皇太后崩葬南陵

在霸陵南

六月丞相故安侯申屠嘉卒

時鼂錯為內使

秦內史掌治京師漢因之

數請問言事輒聽寵幸

傾九卿

漢正九卿奉常郎中令衛尉太僕廷尉典客宗正治粟內史少府是也

法令多

所更定丞相嘉疾之錯以內史門東出不便乃更穿

一門南出南出者太上皇廟垣

內垣外游地

垣也嘉聞為

臨江王典鼂錯同罪一為之曲底一微之對簿何以服人心哉

奏請誅錯客有語錯錯恐夜入宮自歸上

自首于上也

朝嘉請上曰錯所穿乃外垣垣故冗官居其中且我

使為之錯無罪嘉罷朝曰吾悔不先斬錯乃為所賣

歐血而死

諡曰節

以陶青

陶陶唐氏之後青高祖功臣開封侯舍子

為丞相鼂錯為御史大夫

彗星出東北

秋衡山

漢國注見前

雨雹

大者五寸深者二尺

熒惑

注見前

逆行守北辰

中宮北極五星亦曰天極

月出北辰間

月有九行

終不能出北辰之間出北辰間失其行也

歲星

注見前

逆行天廷

太微為天廷

中

丁三年冬十月梁王武來朝

十

梁王以竇太后少子故有寵居天下膏腴地

北界泰山西至

以傳位重事為  
戲言致梁王妄  
生覬覦啟觀台  
亂即剪桐之誤  
亦不可比類矣

高陽四十餘  
城皆大縣

賞賜不可勝道

府庫金錢且百鉅萬  
珠玉寶器多于京師

至

是來朝時上未置太子與王宴飲從容言曰千秋萬  
歲後傳于王王辭謝雖知非至言然心內喜太后亦

然詹事

秦官漢因之掌  
皇后太子家

竇嬰

字王孫太  
后從兄子

引卮進酒曰

天下者高祖之天下父子相傳漢之約也上何以得

傳梁王太后由是憎嬰嬰遂病免太后除嬰門籍入

殿門之籍梁王以此益驕

廣睢陽城築東苑招延四方游  
士莫不至焉 睢陽故城在今

河南歸德府商邱縣南東  
苑亦曰兔園在商邱縣東



長星出東方

春正月吳王濞膠西王卬膠東王雄渠菑川王賢濟南

王辟光楚王戊

元王交之孫

趙王遂反以條

亦作修今直隸河間府景州有

南條城故漢縣也

侯周亞夫為太尉將兵討之

初孝文時吳太子入見得侍皇太子飲博爭道不恭

皇太子引博局提

音抵擲也

殺之吳王由是怨望稱疾不

朝始有反謀後使人為秋請

孟康曰律春曰朝秋曰請如古諸侯朝聘也

文帝責問之使者曰察見淵中魚不祥

語見韓非子

唯上

范錯削地之謀  
雖中無成策而  
出之太驟然猶  
曰為國家計久  
安也至事變已  
成乃汲汲自請  
居守欲以苟免  
自全則適足以  
殺其軀而已

棄前過與之更始于是文帝賜吳王几杖老不朝其  
謀乃解然以此日益橫范錯數言吳過可削文帝寬  
不忍罰及帝即位錯曰吳王不朝于法當誅文帝弗  
忍德至厚也當改過自新乃益驕恣公即山鑄錢煮  
海為鹽誘天下亡人謀作亂逆今削之亦反不削亦  
反削之其反亟禍小不削其反遲禍大上命列侯公  
卿宗室雜議莫敢難獨竇嬰爭之錯又言楚趙皆有罪  
請各削一郡膠西以賣爵事削六縣方議削吳吳王

恐削地無已因發謀舉事聞膠西王勇好兵使人說

之又身至膠西面約

吳王使應高往說膠西王王初不許高說以兩分天下乃許之

吳王猶恐其不果乃身自為使者至膠西膠西羣臣聞其謀諫王曰今承一帝尚云不易假令事成兩主分爭患乃益生王不聽遂發使約齊菑川膠東濟南皆許諾楚

王戊坐削地亦與吳通謀

初楚元王與魯申公穆生白生俱受詩于浮邱伯及

王楚以三人為中大夫穆生不嗜酒元王每為設醴及孫戊即位常設後乃忘設焉穆生退曰可以逝矣醴酒不設王之意怠不去楚人將鉗我于市遂稱疾卧申公白生強起之曰獨不念先王之德乎今王一且失小禮何足至此穆生曰君子見幾不俟終日先王之所以禮吾三人者為道存也今而忽之是忘道

也忘道之人胡可與久處豈為區區之禮哉因謝病去戊稍淫暴太傅韋孟作詩諷諫不聽亦去及與吳通謀申公白生諫戊胥靡之衣之赭衣使杵臼碓春于市穆氏楚穆王之後以謚為氏浮邱複姓伯齊人韋承韋氏後孟彭城人後徙鄒及削吳會稽豫章郡書至吳王遂

先起兵殺漢吏膠西膠東菑川濟南楚趙亦皆反齊

王孝王後悔背約城守濟北王城壞未完其郎中令

刼守王不得發兵膠西膠東菑川濟南共攻齊圍臨

淄趙王遂發兵住其西界北使匈奴與連兵吳王悉

其士卒二十餘萬閩東越亦發兵從起廣陵西涉淮

錯之罪在欲自  
守然此際斷不

并楚兵遣諸侯書罪狀鼂錯欲合兵誅之攻破梁棘

壁

即春秋大  
棘注見前

乘勝而前銳甚梁王遣將軍擊之皆敗

還梁王城守睢陽初文帝且崩戒太子曰即有緩急

周亞夫真可任將兵及是七國反書聞上乃拜亞夫

為太尉將三十六將軍擊吳楚曲周侯酈寄擊趙將

軍樂布擊齊復召竇嬰拜大將軍屯滎陽監齊趙兵

殺御史大夫鼂錯

帝與錯議出兵事錯欲令上自將兵而身居守又言

可誅之至其贊  
畫縱不得為合  
宜然其識過明  
代方黃輩豈遠  
乎帝初與定計  
旋為讐口所動  
新謀臣以謝叛  
人及知其無濟  
而又悔之具識  
見卑鄙不更出  
建文下乎

徐僮之間吳未下者可以予吳錯素與吳相袁盎不  
善及吳反錯以盎宜知吳計謀欲治之人有告盎盎  
恐夜見竇嬰為言吳所以反願至上前口對狀嬰入  
言上乃召盎盎入見上方與錯調兵食問盎曰今吳  
楚反于公意何如盎曰願屏左右上屏人獨錯在盎曰  
臣所言人臣不得知乃屏錯錯趨避東廂甚恨卒問盎對曰  
吳楚相遺書言賊臣鼂錯擅適讀作謫諸侯削奪之地  
以故反欲共誅錯復故地而罷今獨有斬錯發使

赦七國復其故地則兵可無血刃而俱罷上默然良久曰顧誠何如吾不愛一人以謝天下乃拜盎為太常密裝治行使吳令丞相廷尉劾奏錯曰錯議陛下自出臨兵使錯居守又欲以城邑予吳無人臣禮大逆無道錯當要斬父母妻子同產皆棄市制曰可錯殊不知上使中尉召錯給載行市錯衣朝衣斬東市

初錯建議侵削諸侯其父自潁川來謂曰疏人骨肉何為也錯曰不如此天子不尊宗廟不安父曰劉氏安遷氏危矣吾不忍見禍逮身錯已死謁者僕射鄧遂飲藥死後十餘日吳楚反

公

城固人亦曰鄧先

為校尉上書言軍事見上上曰道軍所

來聞鼂錯死吳楚罷否鄧公曰吳為反計數十歲矣以誅錯為名意不在錯也夫鼂錯患諸侯彊大不可制故請削之以尊京師萬世之利也計畫始行卒受大戮內杜忠臣之口外為諸侯報仇臣竊為陛下不取也帝喟然曰吾亦恨之盜至吳吳楚兵已攻梁壁因留盜軍中欲劫使將盜不肯使人圍守且殺之盜得間懷節旄夜亡走梁遂歸報



二月太尉周亞夫大破吳楚軍，漢亡走越，越人誅之，戊  
自殺。

亞夫之將也，請于上曰：「楚兵剽輕，難與爭鋒，願以梁

委之，絕其食道，乃可制也。」上許之。亞夫乘六乘傳，張晏

曰：欲急馳，故乘傳車六乘。將會兵滎陽，發至霸上，趙涉遮說曰：「吳

王素富，懷輯死士久矣。知將軍且行，必置間人于葢

澠，阮隄之間，且兵事尚秘密，將軍何不從此右去，走

藍田，今縣屬陝西西安府出武關，抵洛陽，間不過差

本漢置以藍田山名

一二日直入武庫擊鳴鼓諸侯聞之以為將軍從天而下也亞夫如其計至洛陽喜曰吾乘傳至此不意自全今吾據滎陽滎陽以東無足憂者使吏搜散澠間果得吳伏兵乃請涉為護軍引兵東北走昌邑深壘而守吳攻梁急梁數使使求救亞夫不許梁慙于上上使告亞夫救梁亞夫不奉詔而使輕騎出淮泗口絕吳楚兵後塞其饗道梁使韓安國

睢陽人字長孺為梁中大

夫張羽

楚故相張敖弟楚反尚諫被殺

為將軍羽力戰安國持重乃

得頗敗吳兵吳兵欲西梁城守不敢西即走亞夫軍  
亞夫堅壁不與戰亞夫軍中夜驚擾亂至帳下亞夫  
堅卧不起頃之復定吳奔壁東南陬亞夫令備西北  
己而吳精兵果奔西北不得入吳楚士卒多饑死叛  
散乃引而去亞夫出精兵追擊大破之吳王濞棄其  
軍亡渡淮走丹徒漢縣歷代因之今為江南鎮江府治保東越越人縱  
殺之盛其頭馳傳以聞太子駒亡走閩越楚王戊軍敗即自  
殺吳楚反凡三月皆破滅于是諸將皆以亞夫謀為

是而梁王由此與亞夫有隙

壬子晦日食

齊王將閭及卬遂皆自殺雄渠賢辟光皆伏誅徙濟北

王志為菑川王

先是三國

膠西膠東菑川

圍齊齊王使路中大夫

張晏曰姓路官中大

夫氏族畧路出帝擊之後以國為氏

告于天子天子復令還報告齊王

堅守漢兵今破吳楚矣路中大夫至三國兵圍臨淄

數重不得入三國將與路中大夫盟曰若反言漢已

破矣齊趣下三國不且見屠路中大夫既許至城下  
望見齊王曰漢已發兵百萬擊破吳楚方引兵救齊  
齊必堅守無下三國將遂殺路中大夫齊初圍急陰  
與三國通謀會路中大夫從漢來其大臣乃復勸王  
無下而樂布等兵至擊破三國兵解圍已聞齊初有  
謀欲移兵伐之齊王懼飲藥自殺膠西王卬詣漢軍  
叩頭請罪弓高漢縣故城在今直隸河間府阜城縣西南侯韓積當執金  
鼓出詔書讀之卬自殺膠東菑川濟南皆伏誅酈寄

攻趙不下樂布破齊還并兵引水灌趙城城壞王遂  
自殺濟北王亦欲自殺齊人公孫攸為說梁王曰濟  
北雖墜言于吳而終底節不下使吳失與而無助破  
敗而無救者未必非濟北之力也梁王以聞濟北王  
得不坐徙封菑川

立故齊王將閭太子壽為齊王楚元王子禮為楚王子

端為膠西王勝為中山

治盧奴今直隸定州王

帝以將閭迫劫有謀非其罪也乃召立其太子壽欲

續吳楚太后曰吳王首為紛亂奈何續其後不許乃

立禮

時封平陸侯為宗正

奉元王後

戊子

四年夏四月立子榮為皇太子徹為膠東王

即武帝

榮栗姬子徹王夫人子

王夫人母臧兒故燕王臧荼女孫也嫁槐里王仲生男信

與兩女仲死臧兒更嫁田氏長女為金王孫婦生女矣臧兒卜金氏婦當貴奪而納之皇太子宮是為王夫人生兒徹徹方在身王夫人夢日入其懷以為貴徵焉

冬十月戊戌晦日食

劉敞曰是年紀事十月在年終誤胡三省曰通鑑蓋承用漢書本紀

也考劉胡二氏之說蓋亦闕疑之意而徐昭文考證以五年當書于日食之上薛應旂甲子彙紀又以日食紀

于四年之首未知孰是今仍通鑑

徙衡山王勃為濟北王廬江王賜為衡山王

初七國反吳使者至衡山衡山王堅守無二志上以為貞信徙王于濟北以褒之廬江王以邊越數通使徙王衡山

且巳五年春正月作陽陵邑豫作壽陵也在今西

募民徙居之賜錢二十萬自是諸帝皆

豫作壽陵

遣公主嫁匈奴單于



庚寅六年冬十二月雷大霖雨

秋九月廢皇后薄氏

上為太子時薄太后以薄氏女為妃及即位為皇后  
無寵至是遂廢

辛卯七年冬十一月廢太子榮為臨江王

長公主嫖

即館陶公主帝之妹下嫁陳  
午嫖正肖反長公主名也

有女欲與太

子為妃栗姬妬以帝後宮諸美人皆因長公主見得  
貴幸故怨怒不許長公主欲與王夫人男徹王夫人

許之由是長公主曰讒栗姬而譽王夫人男之美帝

亦自賢之王夫人知帝嫌栗姬陰使人趣大行

本典客改

大行令掌九儀之制

請立栗姬為皇后帝怒曰是乃所宜言邪

遂按誅大行而廢太子太傅竇嬰力爭不能得乃謝病免栗姬恚恨而死

庚寅晦日食

春二月丞相青免以周亞夫為丞相罷太尉官

夏四月立夫人王氏為皇后膠東王徹為皇太子

以郅都

郅商時侯國後以為氏都河東大陽人

為中尉

都為人勇悍公廉不發私書問遺無所受請謁無所聽及為中尉獨先嚴酷列侯宗室側目而視號曰蒼鷹臨江王榮坐侵太宗廟堧垣為宮徵詣中尉府對簿

事在中元二年

王欲得刀筆

顏師古曰古者著書于簡牘必用刀

為書謝上

都禁吏不予寶嬰使人間予之王既為書因自殺太后聞之怒後以危法中都殺之

壬辰

中元年夏地震

衡山原都

胡三省註原都地名蓋屬衡山

雨雹

大者尺八寸

癸巳二年夏四月有星孛于西北

立子越為廣川王

彭祖徙趙故立越

寄為膠東王

徹為太子故立寄

秋九月甲戌晦日食

梁王武使人殺袁盎

梁王以至親有功得賜天子旌旗出蹕入警寵信羊

勝公孫詭二人多奇邪計說王求為漢嗣王遂入朝

在前七年

帝使使持乘輿駟迎于關外既朝上疏因留

以王

太后故入則侍帝同輦出則同車遊獵梁侍中郎謁者著籍引出入天子殿門與漢宦官亡異會栗

太子廢太后因置酒謂帝曰安車大駕用梁王為寄

帝跪席舉身曰諾罷酒召諸大臣問曰太后言如是

何謂也皆曰太后意欲立梁王為帝太子袁盎曰昔

宋宣公不立其子而立弟

事具前

以生禍亂五世不絕

小不忍害大義故春秋大居正請入見太后白之太后議格遂不復言而使梁王歸國梁王由此怨盎與

勝詭謀陰使人刺殺盜

梁刺者十餘曹先刺者聞盜名不忍刺其後曹遮殺盜安

陵郭門外

及他議臣十餘人于是天子意

猶疑也

梁逐賊果

梁使之遣田叔往案捕詭勝詭勝匿王後宮內使韓

安國見王泣曰大王誅

見謫也

邪臣浮說犯上禁撓明

法天子以太后故不忍置法太后日夜啼哭幸大王

自改大王終不覺悟有如太后宮車即晏駕大王尚誰

攀乎語未畢王泣數行下令詭勝自殺出之

上方怨梁遣使

覆按梁事冠蓋相望于道王恐使鄒陽入長安見皇  
后兄王信說曰長君弟得幸于上而長君行迹多不

田叔案梁事雖  
云善處骨肉之  
間但所以致此  
者以君無能也  
太陽出而燭火  
自熄矣然使明

循道理者今梁王即伏誅太后無所發怒切齒創目  
于責臣竊為足下憂之長君誠為上言得毋竟梁事  
太后德長君入骨髓而長君之弟幸于兩宮金城之  
固也昔者象日以殺舜為事舜立為天子封之有庠  
是以後世稱之以是說天子徵幸梁事不時太后憂  
奏長君乘間言之帝怒稍解鄒陽齊人時太后憂

梁事不食日夜泣不止帝患之田叔等還至霸昌廐

括地志在萬年縣東  
北萬年今咸寧縣治

悉燒梁獄辭空手來見帝曰梁

有之乎田叔曰上母以梁事為問也今梁王不伏誅  
是漢法不行也伏法而太后食不甘味卧不安席此  
憂在陛下也上大然之使叔等謁太后曰梁王不知

季諸臣有一如  
田叔者亦何至  
三案紛爭說就  
不已馴致亡國  
而後已哉

也為之者幸臣羊勝公孫詭之屬耳謹以伏誅梁王  
無恙也太后聞之立起坐餐氣平復梁王因上書請  
朝用茅蘭梁大夫說乘布車從兩騎伏斧質于闕下謝  
罪太后帝大喜相泣復如故然帝益疏王不與同車  
輦矣以田叔為賢擢為魯相

甲午三年夏四月地震

立子乘為清河

治清陽故城在今直隸廣平府清河縣東

王

立十二年卒無子國除

秋九月蝗



戊戌晦日食

丞相亞夫免

初上廢栗太子亞夫固爭之不得而梁王每與太后言亞夫短太后欲侯王信帝與亞夫議之亞夫曰高帝約非有功不侯信雖后兄無功侯之非約也帝默然而止後匈奴王徐盧等六人降帝欲侯之以勸後亞夫曰彼背其主而降侯之則何以責人臣不守節者乎帝曰丞相議不可用乃悉侯徐盧等亞夫因謝病

免

以劉舍

桃侯劉襄子嗣為侯

為丞相

乙未四年冬十月戊午日食

丙申

五年夏立子舜為常山王

常山文帝時併入趙今復為國

大水

九月詔獄疑者讞之

詔曰獄人之大命死者不可復生朕甚憫之諸獄疑

若

猶言若疑也

雖文致于法而于人心不厭

謂不服也

者輒讞

之

地震

丁酉六年冬十一月改諸官名

更命廷尉為大理奉常為太常典客為大行

後更為大鴻臚

治粟內史為大農

後更為大司農

將作少府

本秦官掌治宮室

為將

作大匠主爵中尉

本秦官掌列侯

為都尉

後更名右扶風

長信詹事

掌皇太后宮

為長信少府將行

本秦官掌后卿

為大長秋大行為

行人

先是更郡守為太守郡尉為都尉更諸侯丞相為相明年又更中大夫為衛尉

春二月行幸雍郊五時

史記封禪書雍五時索隱曰秦宣公作密時祀青帝靈公作上

時祀黃帝下時祀炎帝獻公作畦時祀白帝本四時後漢高祖入關曰天有五帝今四何也待吾而具遂作北時祠黑帝于是雍有五時括地志五時原俱在雍縣南考秦襄公作西時文公作鄜時皆祠白帝以非雍地故不在五時之數

夏四月梁王武卒

諡曰孝

分梁地王其子五人

先是梁王入朝上疏欲留帝不許王歸國意忽忽不樂未幾卒太后哭極哀不食曰帝果殺吾子帝哀懼不知所為與長公主計之乃分梁為五國盡立孝王

男五人為王

買為梁王明為濟川王彭離為濟東王定為山陽王不識為濟陰王

女五

人皆食湯沐邑太后乃說為帝加

餐

梁後五王濟川濟東俱以

罪廢山陽濟陰俱無子國皆除惟梁獨存

六月匈奴寇鴈門

漢郡治善無故城在今山西朔平府右玉縣南上郡

匈奴入鴈門上郡李廣人

成紀

為上郡太守

廣初為上谷太守數

與匈奴戰公孫昆邪謂上曰李廣材氣天下無雙自負其能數與虜角恐亡之乃徙上郡從百騎

出卒遇匈奴數千騎廣騎欲馳還廣曰吾去大軍數

十里今走匈奴追射我立盡今我留匈奴必以為大

軍之誘不敢擊乃令諸騎前未到匈奴陳二里所皆  
下馬解鞍以示不走匈奴有白馬將出護其兵廣上  
馬與十餘騎奔射殺之還解鞍令士皆縱馬卧會暮  
匈奴終怪之不敢擊夜引而去

秋七月辛亥晦日食

以甯成

南陽  
獲人

為中尉

自邳都死長安宗室多暴犯法上乃召濟南都尉甯  
成為中尉其治效邳都其廉弗如然宗室豪傑人人

惴恐

成後遷內史以罪廢已復起為關都尉吏民出入關者號曰寧見乳虎無直寧成之怒其暴如此

此

戊戌後元年春正月詔治獄者務先寬

詔曰獄重事也人有智愚官有上下獄疑者讞有司

有司所不能決移廷尉讞而後不當讞者不為失

師顏

古曰假令讞訖其理不當所讞之人不為罪失欲令治獄者務先寬

夏地震

震凡二十二日

丞相舍免

秋七月乙巳晦日食

八月以衛綰

大陵人

為丞相直不疑

直氏楚人直弓之後不疑南陽人

為

御史大夫

初綰以戲車

顏師古曰若今弄車之技

為郎事文帝遷中郎將醇

謹無它

無餘志念也

上為太子時召文帝左右飲綰稱病

不行文帝且崩屬上曰綰長者善遇之故上亦寵任

焉不疑為郎有同舍告歸誤持其同舍郎金去同舍

無辨息枋固不  
失為長者然無



辭足矣實金而  
償矯情斯甚且  
我乃無兄不已  
深于自明乎蘇  
軾謂不疑家垢  
求名良然

亞夫為將則有  
功為相則守正  
賈誼所謂可以  
託不御之權者  
庶幾近之反謂  
鞅缺非少主臣  
而取醇謹無定  
之術紹何以為

郎疑不疑不疑買金償後告歸者至而歸金亡金郎  
大慙以此稱為長者人或毀不疑以為盜嫂不疑曰  
我乃無兄然終不自明也

下條侯周亞夫獄亞夫不食死

上召亞夫食獨置大胾無切肉又不置箸亞夫心不

平顧尚席

主者

取箸上視而笑曰此非不足君所乎

孟康曰此非不足滿  
于君所乎嫌恨之也

亞夫免冠謝上上曰起亞夫因

趨出上目送之曰此鞅鞅非少主臣也居無何亞夫

知人之明乎

子為父買工官尚方

工官即尚方之工尚方少府屬掌工作器物

甲楯可

葬者為人所告事連汚亞夫名詣廷尉廷尉責問曰君侯欲反乎亞夫曰臣所買乃葬器也何謂反乎吏曰君縱不欲反地上即欲反地下耳侵之益急亞夫不食五日歐血而死

己亥二年春正月地一日三動

夏四月詔戒二千石

漢太守秩二千石

修職事

詔曰雕文刻鏤傷農事者也錦繡纂組害女紅者也

農事傷則饑之本也女紅害則寒之原也饑寒並至而能亡為非者寡矣朕親耕后親桑以奉宗廟粢盛祭服為天下先不受獻減太官

少府屬掌膳食

省繇賦欲天

下務農蠶素有蓄積以備災害彊無攘弱衆無暴寡老者以壽終幼孤得遂長今歲或不登民食頗寡其咎安在或詐偽為吏以貨賂為市漁奪百姓侵牟萬民縣丞長吏也姦法與盜盜

謂犯法者直共盜為盜耳

甚無謂也

其令二千石各修其職不事官職耗

讀與耗同不明也

亂者

丞相以聞請其罪

秋大旱

子庚子三年冬十月日月皆赤凡五日

十二月晦雷日如紫五星逆行守太微

晉書天文志太微天子庭五帝

之座十二月諸侯府也月貫天庭注見前中

春正月詔勸農桑禁采黃金珠玉

詔曰農天下之本也黃金珠玉饑不可食寒不可衣間歲或不登意為末者衆農民寡也其令郡國務勸

農桑益種樹可得衣食物吏發民若取庸

韋昭曰發民用其民

也取庸因其資以雇庸也

采黃金珠玉者坐贓為盜二十石聽者

與同罪

帝崩太子徽

即位

是為孝武帝

尊皇太后為太皇太后皇后為皇太后

二月葬陽陵

注見前

景帝之治遠不逮文而失德之事屢矣獨其休息愛民尚不失

史臣曰漢興掃除煩苛與民休息至于孝文加以恭儉孝景遵業五六十載之間至于移風易俗黎民醇厚周云成康漢云文景美矣

崇業而安耳史  
臣以之並擬成  
康未免失實

御批歷代通鑑輯覽卷十四